

THUGIN BULPITE ZILSAHNA
SENIOR-II

To,

.....
.....

Translated by
Rt. Rev. Dr. V. Hangminthang
Bishop, MELC

Published by
Nu M. Lamniang Zou,
Lamphelpat, Imphal

SENIOR - II

THUGIN BULPITE ZILSAHNA

First Edition: 2017

No. of copies: 1000

Printed at

The Convention Book House
Dorcas Road, New Lamka
Churachandpur - 795006
Manipur.



Lutheran Youth Fellowship
GENERAL HEADQUARTER
 (Manipur Evangelical Lutheran Church)

(Constituent Member Church of Evangelical Lutheran Churches In The Himalayan States)

Head Office: Zomi Colony, Churachandpur - 795128, Post Box- 10, Manipur, India.
 Regd.No.101 of 1987 Govt.of Manipur. Regd.No.194160073 with Ministry of Home Affairs, Govt.of India.

PUBLISHER KUNGA LUNG DAM TUTNA

Tam MELC sunga LYF GHQ. Sunday School Union saina a Senior-II zil ding laibu khu zou thei a i um tah jiehin Pasion kungah lungdamthu itut hi.

Tami laibu hing sutpieh Pi Lamnieng W/o Pu M. Shesei, Chairman ADCC, Chandel District kungah zong Pasion min in lungdamthu itut hi.

Pi Lamnieng leh a innsung mite kungah Pasion in a itna leh a jangaina sulangh tou jel henlen; silpha tampi bawl zou jel thei diingin, nei-le-lam, pilna siemna leh sil bawltheina in phungvua tawntung taken, chin ideisahna thupha ipia uhi.

Sd/-

Dated : Zomi Colony
 The 21st February, 2017.

Pro Pastor M. Kamneithang Zou
 Superintendent
 Sunday School Union, GHQ. LYF.



Lutheran Youth Fellowship
GENERAL HEADQUARTER
 (Manipur Evangelical Lutheran Church)

(Constituent Member Church of Evangelical Lutheran Churches In The Himalayan States)

Head Office: Zomi Colony, Churachandpur - 795128, Post Box- 10, Manipur, India.
 Regd.No.101 of 1987 Govt.of Manipur. Regd.No.194160073 with Ministry of Home Affairs, Govt.of India.

LUNGDAMPINA

23rd January, 2017

Tami laibu “Na Theina Din Zilin” Senior-2 LYF GHQ OB Meeting Thupuohsan Nos. 1 (ii) (a) of Dated 22/11/2016 leh 60 veina LYF GHQ Annual Council, 2016 of Dated 4/12/2017 in Naupang Sunday School Subject Evangelical Convention Church (EBC) te Subject pen ei Zou Kaam a lekhiet diinga nget dia phasah dungjui a, i ngetna uh EBC Office in phalna No. EBC /MN/ 4 (2016 (44) zieh in atung uah nuomthu igen uhi. Tualeh tukum 2017 a tawi panthei a ium man un Pasion thupina ipie uhi.

Tualeh, tami laibu mawpuohna ipieh dungjui a, tawmngaitah a gim-le-tawl khosahlou a hingna buopite:-

- i) Rt. Rev Dr V. Hnagminthang, Bishop MELC
- ii) Pastor Khup Do Khen, DM/MELC i/c Youth Department leh
- iii) Pro Pastor M. Kamneithang Zou, Superintendent Sunday School Union LYF/GHQ ten tami laibu Na Theina Din Zilin Rev V. Hangminthang, Moderator MELC in 1999 a Senior-2 a diinga ana lekhiet khu LYF Office Bearer Committee phasahna banga “Thugin Bulpite Zilsahna” chia henkhia ahiban ah, Senior-2 te zil diinga ahing bawlkhietzieh un amaute tungah LYF GHQ thakhelin lundam thu ka tut uhi.

Tami laibu tungtawn in Mangpa'n Nuapangte (Khanglaite)
a thutah a hing khanglian sah in, hing guolzawl taken chiin deisahna
ka hing Phuong uhi.

Mang gam a naseppi uh

Sd/-

P. Tunzang
Chairman LYF/GHQ

Sd/-

Upa S. Zamkhanpau
Gen. Secretary LYF/ GHQ

SUIBAI LAMNA

Thupite	Laimai Nambat
a) Publisher Kunga Lungdam Tutna	iii
b) Lungdampina	v
1. Lai siengthou Pasion Thu Ahi Kichetna.....	1
2. Apokrifa Leh Pseudoepigraph Laibute	5
3. Lai siengthou Zil Ding Ahi	8
4. Pasion Hina Leh Thukhauna	12
5. Pasion Minte Genchetna	16
6. Jesu Khrist Etton Ding Ahi	20
7. Tulaitah A Jesu Khrist Nasep	23
8. Hagau Siengthou A Dimna.....	26
9. Hagau Gaa (The Fruit Of The Spirit).....	30
10. Hagau Siengthou Silthawnpia.....	34
11. Sawlna Leh Za-Etnate.....	39
12. Hinkhuo A Pasion Deidan Zui Ding Ahi.....	44
13. Biehna (Worship).....	48
14. Phatna Leh Pahtawina.....	52
15. Khristian Thawlawm Piehna.....	57
16. Thumna (Prayer)	61
17. Khristian Guolzou Hinkhuo.....	66
18. Mimal A Hagau Mangthai Suina.....	71
19. Halhana (Revival).....	76
20. Hattuom Kithununna (Church Displine).....	80
21. Sabbath Ni Hilou Mangpa Ni Ahi Apويمaw	84
22. Khristian Kiteenna	89
23. Nu Leh Pate Zatatna.....	93
24. Thuhun Tha A Missionary Nasep.....	96
25. Hagau Lam Khanna Ding Lampi.....	100

SIMMUN-1

LAISENGTHOU PASIAN THU AHI KICHETNA

Thuchin ding : *“Aziehpén Pasion thu ahinga, sil abawl thei a, namsau alangni a tat tuo hiem sangin ahieim zaw a, hinna leh Hagau, tualeh gu kituona leh chintuigu khentheh khopin asun thei a, lungtang ngaituonate leh tupte akhen thei hi.”* Heb. 4:12

Taangtel : Late 119:1-176

Zillai in atup : Laisiengthou muonlah nading umlou a Pasion thu ahi chi ziltuten kichientah a theisah ding chi ahi.

THUZIL DING:

Laisiengthou in genkhiel neilou in adih sieng hi. Telsuina toh kisai, leitung gamthu toh kisai leh khang tangmi toh kisai inzong adih sieng hi. Lei leh van siempa Pasion in Laisiengthou abawl ahi. Leitung mihingte lai giel atul jel a, nanleh Laisiengthou tuabang hilou hi. Kum sang tampi nua inzong adihna kichien semsem in beitheilou hi. Laisiengthou gen bang a Pasion tahsang loute mimaw ahi (Late 14: 1, 53: 1). Laisiengthou kammal tahsang loute mimaw ahi (Lk. 14: 25-27). Leitung damsung khellam ngaisun loute mimaw ahi (Lk. 12: 12-21). Pil iut leh Laisiengthou hoitah a isim ding ahi (Kol. 2:2-3, Jak. 1: 5, Job 28: 28).

- i. **Laisiengthou in kipum khatna genchien hi:** Laisiengthou kigel hun sung kum zabi sawm leh guh bang lut napi'n a thugen kipum khat hi. Siemchilbu akipan Kihilna thu tuom hilou in akizom, tup leh ngim kibang ahi. Thuhun Lui laibu kigel nukhia pen khu Malaki leh Mathai kigel kikal sung kum 400 bang alut hi. Ahivangin Laisiengthou laigil Jesu Khrist ma hi veve hi. Thamlou in Laisiengthou giel mi tuomtuom 40 bang apha ua, neh suina tuomtuom, geldan tuomtuom, mun tuomtuom akipan agiel ahivangin laibu khat ahi veve hi (Isai. 34: 16:).

- ii. **Laisiengthou kisuhsiet zawlouna in genchien hi:** Laisiengthou sil kisethei Savun, peh leh laidal a kigel ahivangin amangthai vawt sih hi. BC 500 hun in kumpipa Jehoiakim in Jeremiah laibu or thugente zadah in atnen in mei ah halvam ahivangin a thu kangtum tuon lou hi. Raman Catholic Hattuum in Laisiengthou mi zousie simding aphallou laiin Kumpipa Dioklsian in AD 303 in Laisiengthou leh akisaipi laibu zousie haltum a akingaisut laiin, “*Khristian kichi min beimangta*” ana chi hi. Kum sawmni nua in Constantin hing lal a Laisiengthou pethei poumah kungah kipahman pieh din achiem a, ni khat in Bu 50 akipia hi! AD 1199 in Pope Innocent III in Laisiengthou zousie haltum din thu apie hi. Ama nua in John Wycliffe in mi chin in Laisiengthou atawichiet ding uh chi agel atangtung hi. William Tyndale (1484-1536) in laisiengthou letkhia in ngavei ana sunsah a, tuami ga in Mangkam in Thuhun Tha masapen AD 1525 in hing piengkhia hi.
- iii. **Telsuina thudih in genchien hi:** Grik mipite’n BC 540 in leitung a bem ding a angaisut lai in mitangpite’n apeeh (flat) hiding in angaisun uhi. Kum zabi 15 lai a Colombus leh Magellan leitung kimkot ah alen masia uh leitung a apeeh (flat) hidin kingaisun chiet hi. Ahivangin guolnei Isaai in leitung abem ahi chi nagen jouta hi (Isai. 40:22). BC 1, 500 lai in Job in Pasian- kam a thupot in leitung vanlai a kikhai ahina anagen hi (Job 26:7). Job main hapi inzong ama apat vahna neilou ahidan angen kia hi (25:5). Tami thu adihna Sir Isaac Newton in AD 1687 in ana mukhe pan hi. Ahsite simseng hilou (Siem.15:5), tuipi, sunga muol leh tangte, loupate, tui lampite um ahichi zong Laisiengthou in anagen zouta hi (2Sam. 22: 16, Jon. 2:8, Late 8:8).
- Chidamna toh kisai in phah (liprosy) natna veite kep tuomna (Deut. 23: 12-13, Lev.12-14), sisan bul munkhat a mihingte pieng ahina (Nas. 17: 26), hinna sisan aum ahina zong Laisiengthou in ana gensieng hi (Levt. 17:11). Laisiengthouna telsuina bu ahilou vangin tualam toh kisai agen zousie adihlou umlou hi/ dih sieng hi (Late 119: 160).

- iv. **Genkhawlna thute in genchien hi:** Laisiengthou Pasion thu ahina kichetna lah a poimaw mama khu genlawhna (prophecy) thu kigente atangtunna ahi. Isrealte lamlia ahi ding (Siem. 12: 1-3), a kumpite Juda nam a pieng ding (Siem. 49: 10), Aigupta a kum 40 saltan ding (Siem. 15: 13), Babylon a kum 70 a saltan ding (Jer. 25: 11, 29:10) leh Messiah aniel ding uh tungtang kim sieng hi (Isai. 53 leh Mt. 21: 42-44). Hun nukhia lam sil tung ding kigente, kidouna leh kidou thuthangte (Mt. 24: 6 cf Mika 4:3), leitung mitna (carnal Christian) uang ding (2Tim. 3:1-2, Lk. 17:26-30), dan bei a gamtatna uang ding (2Thess. 2:2-4), mihing tam ding (Siem. 1:28 cf Lk. 17:26-27), pilna khang ding thu (Dan. 12:4), ginna kihei mangsan ding thute (2Thess. 3:2, 1Tim. 4:1, 2Tim. 3:5, 4:3-4, 2Pet. 3:3-4), dawithu gintatna uang ding (1Tim. 4:1-3) atangtung lou umnon lou hi.
- v. **Jesu Khrist toh kisai genkhawlna in agenchien hi:** Tampi lah a neunou khat iteel ding uhi. Jesu Khrist nungah siengthou apan pieng ding kigen lawhna leh a tangtunna (Isai. 7: 14, Mt. 1:22-23), Jebulun a Bethlehem hilou, Bethlehem-Ephratha a apien ding thu (Mika 5:2, Mt.2:6) leh adang tampi um nalai hi. Mipilte'n Ama silpieh toh ave ding thu (Isai.60:3,6,9, Mt. 2:11) a pian hun a naupang tampi shi ding thu (Jer. 31: 15, Mt. 2:17-18), Jerusalem a guoljou ah alut ding thu (Zek. 9:9, Mt. 21: 4-5), dangka peh 3 ajuoh ah aum ding thu (Zek. 11:12-13, Mt. 26: 14-16), leh adang tampi um khu atungsa jou tampi umta. A hing tung nalai ding zong tampi um nalai hi. Tua ahiman in Laisiengthou gintatlouna ding umlou hi.

Akhupsitna: Laisiengthou Pasion thu ahina niel guollou in akichien hi. Pasion thu ahiman in mitampite hinna kisesa khel lamdang a, mikhiel leh giloute zong Pasion misiengthoute in kikhelsah thei hi. Tambang Laibu leitung ah um lou hi. Akigel tung akipan tuni chieng dongin gelbe ding paikhiet ding umlou in kiching hi. *Khrist, Laisiengthou sunga thute sung thu ahi.* Laisiengthou thu tahsang lou anielna pen tangtawn hinna leh vangam nielna ahi.

Dohnate:

- i) Laisiengthou Pasion thu ahina kichetna lah a poimaw mama bang ahiei?
 - ii) Thuhun Tha masapen bangchi kum a piengkhia ahiei?
 - iii) Laiseingthou laigil bang ahiei?
-

SIMMUN-2

APOKRIFA LEH PSEUDOPIGRAPH LAIBUTE

Thuchin ding : “*Ken kidouna hoi ka douta a, kitaidemna ka zouta hi, ginna kakemta hi.*” 1Tim. 4:7

Taangtel : 1Tim. 1:18-20, 4:1-10, 2Tim. 1:8-14

Zillai in atup : Pasion huhhakhum hilou laigelte theisiemsah tup ding ahi.

THUZIL DING:

Siemchilbu apan Malaki tan kigiel sungin Pasion in amisiengthoute zang in a thute huhhakhum in agelsah hi. Tua jou kum 400 sung huhhakhumna Pasion in zang nonlou in khawl hi. Tua kum 400 sungin Laisiengthou sunga mite min leh Laisiengthou polam thu tuomtuom leh phuotawm thutah a lahtheilou laibu tampi na kigel hi. Tuate “*Aprokrifa laibu*” (Thu kisel, thuguh china) leh “*pseudoepigraph*” (laigel dihloute, phuotawm thute china) laibute kichi hi. Roman Catholic hattuom in aprokhifa apom uhi. Evangelical hattuomte’n akipawm sih hi. Azieh gending tampi aum hi, tuate lah apoimaw diehte zilkhe ding uhi. Tuate ahileh:-

- i) **Ageltute Pasion mizat ahisih uhi**: Aprokrifa leh Pseudoepigraph laibu geltute Pasion mizat guolnei/ kamsangte leh amau nungzuite ahi sih uhi. Pasion mizatte laigel hilou a thu zong adihlou hi chi khu ipom dan uh ahi (2Pet. 1:21).
- ii) **Thugin zilna dihlou akigel hi**: Aprokrifa leh Pseudoepigraph laibute zilsahna Laisiengthou dangte toh akituoh sih a, zilna dihlou ahi nalai a, “*Mishi sate dia thumsahna*” (2Macc.12: 45-46) leh “*nasep a hundamna*” (Tobit 12:9) adih sih hi. huhhakhum akigel laibute’n tuabang zilsahnate aniel uhi (Heb. 9: 27, Lk. 16: 25-26, 2Sam. 12:19, Siem. 15:6, Rom 4:5, Gal. 3:11, Epe. 2:8-9). Wisdom (Pilna Bu) 11:17 inzong Pasion silsiemte dan “*umlou apan*” bawl ahidan aniel (1Jn. 1:1-3, Heb.11: 3). Thuphuo tawm

leh Laisiengthou toh kikal a um ahi. (Bel & Dragon vs 6:16).

iii) **Huhakhum ahina uh kilanglou:** Aprokrifa laibute leh Pseudoepigraph laibute sungah huhakhum a thugel ahina uh genna a um sih hi. Khupching leh Ngambawm thu a tah a aum theilou thu kigente bang ahi.

iv) **Huhakhum laibute lah a kipomkhawm ngailou:**

i) Thuhun Lui kaikhawm Ezra in huhakhum laibute lah ah pangsah ngailou in, tua mabang in Pharisaite'n zong na gensawn ngailou uhi.

ii) Philo (BC 20-AD 40), Alexandria a Juda mipil (philosopher) in Thuhun Lui laibu tampi apan thute alahsawn vangin Aprokrifa laibute apan lasawn ngailou hi.

iii) Josephus (AD 30-100), Judate Tangmi gelpa'n Aprokrifa laibute apan thugelte lasawn ngailou in, Thuhun Lui laibu Hebrute Laisiengthou a phaza laibu 22 ahi chiin gen hi.

iv) Jesu Khrist leh Thuhun Tha geltute'n tua inei Thuhun Lui laibu 39 apan thu lahsawn tampi anei vangun, Aprokrifa laibute apan lahsawn nei ngailou uhi. Tua in Pasian huhakhum thu in apomsih uh chi agenchieng mama hi.

v) Judate laisiem minthang Jamnia (AD 90) in Pasian huhakhum laibute agen chiengin Aprokrifa pangsah ngailou hi. Ama Pasian jaumi leh gingtu ahi.

vi) Kum zabi 4 tan in hattuom vaihawm pawl leh thuneina tawi koiman tami Aprokrifa laibute Pasian thu in apom ngai sih uhi.

vii) Hebru apan Latin Laisiengthou letpa Jerome (340-420 AD) in Latin Vulgate Bible atelsah teitei dinga asawl vangin huhakhum laibute lah ah telsah tuonlou hi. Ama ashi Roman Hattuom in guongtha uhi.

viii) Martin Luther, Reformerte leh Catholic lamkai tampite'n Reformation (KIPUOPHAT HUN) zou apat in Aprokrifa laibute dihlu ahichin niel uhi.

- ix) AD 1546 in Reformerte vanga Roman Catholic Hattuum ngiemkietna douna dingin Trent Hattuum vaihawmna ah Roman Catholic in Aprokaifa laibute amau Laisiengthou ah guonglut uhi.

Akhupsitna: BC 303 in Thuhun Lui laibu 39 Pasion thu mama ahi chi theichetna toh Pasion huhakhum thute ahi chin kipom hi. Tami nasepna a Lamkai Ezra hi ding a gintat ahi (Ezra 7:6). Tua chiengin Carthage khopi a hattuum vaihawm khawmpi AD 397 in Thuhun Tha laibu 27 Pasion huhakhum thute kigel Pasion thu ahi chiin phuonkhia uhi. Carthage khawmpi in aphuonkhiet man a Pasion thu hilou in Pasion thu ahi chi akitheichet man a a phuonkhiet uh ahi. Liberalte bangin Pasion thu gingtalou in, “*Laisiengthou sungah Pasion thu pangkha ahi*” ichi mai ding ahisih. Limsangte bangin pailen in Laisiengthou polam kilahnate leh mangmunate zangin Pasion thu deikhoplou in isuibeh sih ding uhi. Evangelical ihi bangin, “*Laisiengthou gen*” ahi chiin izui ding uh ahi.

Dohnate:

- i) Evangelicalten Aprokraifa bangjeh a apomlou uh adiei?
 - ii) Liberal ten Bible apomdan uh bang ahiei?
 - iii) Evangelicalten Laisiengthou bangchi zui ding ahiei?
-

SIMMUN-3

LAISIENGTHOU ZIL DING AHI

Thuchin ding : “*Na thu khu ka keng dingin meivah ahi a, ka lampi a dingin vah ahi.*” Late 119:105

Taangtel : Late 19: 7-10, 119:97-112

Zillai in atup : Pasion thu hagau lam ann, hinna vahthei ahiman a lunglut tah a hunbi nei a sim gige ding ahidan theisah ding ahi..

THUZIL DING:

LAISIENGTHOU thute Pasion thu ahiman in hagau lam an tahtah ahi. Khristiante ading in thumna khu huu lahna, nahna ahi bangin mi hat mama khat um nanleh an nelou in ngawl gige leh hatdenlou ding hi. Chidam nading, thahat nading, khan nading in an neh poimaw hi, tua mabangin, Khristiante dia Lasiaienghou sunga Pasion thute hagau lam chidam nading, thahat nading, khan nading leh melmapa izawh nading in sim gige ding ahi. Piengtha dihtah ten *Pasion thu aduh ua asim nuom uhi*. Pientha kichetna khat zong ahi. Nang bang chibang khristian nahi ei? Kitel chien in.

i) **Laisienghou sim amanphat dan:** Laisienghou sim a manphatna atam hi. A unsienge pia gen joulou ding ihiman in, apoimaw deudiahte kikum vai.

A. Pientha loute adingin:

- i) Pientha theina dinga hilpil dingin Laisienghou sim gige/ ngeingei ding ahi (2Tim. 3:15-17). Timothy kunga hanthawwna khu eite kunga zong hanthawwna ahi.
- ii) Mikhiel hina kichientah a theina dinga sim ding ahi (HHeb. 4: 12). Pasion thu zangin Hagau Siengthou in mikhiel khelna a kiphawh sah thei lel hi (Jn. 16:8-10).
- iii) Piengtha sahten zong Laisienghou isim ding ahi (Jak.

1:18, 1Pet. 1:23, Late 19:7). Pasion thutah Laisiengthou pansan a neilou pienthana pen pienthana dih tah hingeilou ahi.

B. Piengthasa, Khristiante adin:

- i) Hagau lam khanna dia an neh banga poimaw sah a sim ding ahi (1Pet. 2:2, Mt. 4:4). Naungeh piengtung noitui dulou pen dihluu ahi. Piengtha in Laisiengthou sim nuomlou hagau lam pien dih kichi theilou ahi.
- ii) Mihing lui, pienken mihing suh siengthouna ding a sim ding ahi (Late 119:9, Jn. 15:3, Eph. 5:26-27). Laisiengthou in khelna pan hing kem ahilou vanglah leh khelna in Laisiengthou toh kisukha lou ding in hing kem ding hi.
- iii) Khiellou dinga hing kemit dingin Pasion thu isim ding ahi (Late 119: 11). Laisiengthou sim gige ahivang a adap a khelna lampi zui teitei aumleh piengthalou hi ding hi.
- iv) Pasion deina lampi dih izui theina dinga i sim ding ahi (Late 119: 105, 133). Pasion thu khu khristiante adingin gamlim bang ahi. I gamtat nading itheisiem nadinga sim gige ding ahi.
- v) Pasion nasem siem, lawching leh gasuo ihi na dingin Pasion thu isimsim ding ahi (2Tim. 2:15, 3:15-17, Jn. 15:7). Laisiengthou simlou, mi thugen bou a kingah khristian hoi leh gasuo um theilou ahi.

ii) **Laisiengthou theisiem nading lampite:** Laisiengthou in agen-nop thu theitel theina dingin lampi tampi um hi. Tuate lah azatdia hoi mama tamlou zilkhawm i ut hi.

A. Pasion thu kigel theisiem dinga velchet ding:

- i) I thuzil in bang agen ei chi theichet ding ahi. A etsah bang ahiei? Chi masa ding hilou hi. A kigel bangbang thei sawm ding ahi.

- ii) Mun leh mual, khopi leh khota, muol leh guom, sing leh suong, lui, ganhing, mihing koikoi gen ahiei chin chiemte in.
- iii) Pa Pasian, Tapa Pasian, Hagau Sienghou Pasian a gen kha ei?
- iv) Thu theibai, thu hamsa, gentena, etsahna gen a um ei? Chiemte in.
- v) A thugen bangza nathei aum ei? Na theisiem lou bang aum ei? Chiemte dipdep in.

B. Hilchet poimawte hilchet ding ahi. Hilchetna toh kisai theidia kilawmte:

- i) Hagau Siengthou panpina ngen in. Laisiengthou geltu dihtah khu Hagau Siengthou ahi. Mihingte pen avanzat hi lel uhi. Amama in theisiemnsa hing pethei hi (Late 119:18, 1Jn. 2:20).
- ii) A thukigel bangbang thei in. Laisiengthou thute mihingte theisiem dinga kigiel ahi. Hamsa din ngaisut vawtsin. Etsah neiin gen leh gentehna thu ngen hilou hi. A gente ma agen giapi mai hi.
- iii) A grammer leh akigel lai tangmi leh mite tawndan leh tatdan pansan theisiem sawm in. a hun thu zong thei in.
- iv) Akizoppi nai amalam leh anualam thute sim in theisiem sawm in, thu khat pou pou theisiemna dingin a nua leh ma thu thei masat poimaw hi chi manghil vawt sin.
- v) Laisiengthou pumpi lungsim a nei in sim in theisiem sawm in. Laisiengthou thu tangla in na utut gensah vawtsin. Laisiengthou pumpi zilsahna pan in theisiem sawm in.

Akhupsitna: Laisiengthou, Pasian thu hi-a, hagau lam thu ahiman in theizaw lou ding ahi chi ding hivawtlou ahi. Piengtha ka hi man in Laisiengthou thute hagau lam thu ahi man in zil poimaw lou,

mimal leh Bible College ah zong, Kalvary a piengtha a simsa ka hi chi zong dihlo, Theina tom kiasathei kamsuo ahi. Laisiengthou Pasion kilahna michin theisiem thei dinga kigel ahi. Hagau lam pi-entha nading leh khan nading a bailam tah a theitheidi ding thu tampi um hi. Tuat zong apoimaw hipai hi. Tuat sim in zil in hagau mi ihisawm ding uhi. Tuachiengin thu hamsa, gentehna thu, etsahna thugen, alim agenthute zong umtham hi. Ei haam a bukim lou man a zong theisiem lou umthei hi. Thuhun Lui Hebru haam a kigel theisiem mama na dingin Hebru haam zong thei poimaw hi. Thuhun tha Grik haam a kigel masa ahi manin itheisiem na dinga Grik haam siem pilzaw leh siemzaw mipil zawte laigel tampi Mangkam aki-gel ahiman in Mangkam theizong Laisiengthou theisiemna dingin poimaw hi. Tua ban ah Bible College leh Seminary a zil bang zong poimaw mama hi. Ihi theina zaza toh Pasion thu theisiem ding in Laisiengthou zil chietvai.

Dohnate:

- i) Piengtha chiemtehna khat bang ahiei?
 - ii) Piengthalou te'n Laisiengthou simna ding ziehte bangbang ahiei?
 - iii) Laisiengthou sim bang ziah a poimaw adiei?
-

SIMMUN-4

PASIAN HOINA LEH THUKHAUNATE

Thuchin ding : *“Tuaziehin Pasion hoina leh thukhaunate ngai-tuoin: Apuate tungah athukhau a, hinanleh nang lamah ahoi hi; ahoina a na um zing pou leh, tua ahisihleh, nang zong satkhietin na um ding hi.”*
Rom 11:22

Taangtel : Rom 9:1-33 leh 11: 1-36.

Zillai in atup : Pasion theidan bukim a itheia, ama tunga imaw-puohna bangbang theisiem dinga zil ding ahi.

THUZIL DING:

Pasion toh kisai bangzat ahieipi zil jouta ua, ahivangin, Pasion hina kibang lou mama nit e pansan in Pasion theidan bukim zaw in theisawm lei inuom hi. Khatvei vei chiengin Pasion hepina hau, itna hau, zahngaina hau in akitheia, alungthahna leh a thangpaina, tuapen a thu khauna lamsang ngaisah lou in aum kha thei hi. Pasion in mikhielte a it in ahepi chi adih mama laiin, mikhiel kisia nuomloute tungah a thangpai a akhelna uh ahuo chi theikhel ding jauhui hi. Pasion hoina tampi itheia a itannua in athukhauna zong theikhawm poimaw hi.

- i) **Pasion’ Hoinate:** Pasion’ hoina ichi chiengin adeisahna, phathuoina, mihiipna, itna, thuoazawhna, lainatna, hepina, guoljawlna bukim itante genna ahi. Pasion ama leh ama Mosi kunga akigenkhiet laiin, *“...Mangpa, Mangpa Pasion lungsiet siem leh khotuo siem leh thuoh theitah leh hoina leh thutah a dim; Sang tampite tunga khotuona langsah zing a, gitlouna, bawlkhelna, leh khelna ngaidam zel a; hinanleh bangchihtana siemmawna mawh maisah lou, pate gitlouna tate tung leh tate tate tunga khang thum khang lina tan apha lapa chin a phuongdoh hi”* (Pawtdn. 34: 6-7) chi in akigen hi. Mosi maia a thupina leh hoina

zousie toh apeisawm laia a kigenna ahi. Late 107 leh 145 bang ah Pasion hoina tuomtuomte kichientah in kilang hi.

Thuhun Tha lam i-etkia leuleu chiengin mikhielte tunga hundam nading toh kisai Pasion hoina sawltah Paul in, "...*Hinanleh khotuona hau Pasion in a itna thupitah ziehin eite ahing it hi. Khiel a shi ihi lai nangawn un zong Khrist toh ahing hing sah khawmta a....Tuachin hun hing tung dingte ah, Khrist Jesu zal itunga ahoina-a ahepina hausatna thupidan ahing ensah thei ding hi*" (Ephe. 2:4-7). Pasion hoina thupi penpen akilatna khu Jesu Khrist tungtawn a mikhiel ahing hundamna ah ahi.

- ii) **Pasion' Thukhaunate:** Pasion thukhaunate Siemchilbu apat Kihilna tan ah kichientah amu thei ahi. Pasion hoina bou ngaisun a a thukhauna lam ingaineu leh iPasion theidan buchinglou ding hi. Adam leh Evi Eden guon a nuomtah a tahsap bangma neilou in akoi a, athumanlou chiengun hamsietna/ gentheina tuni chieng dongin a thuohkhawp ding utoh delkhia hi. Naoh hunlai inzong migiloute zieh a tuichim atunsah ding laiin thuhilna (warning) apiehnuo inzong, migilouten tua thupiah (thuhilna) ngaisalou a aum jiehun, Naoh leh a innkuonpite mi-8 chilou mihing zousie tuichim in atthat sieng hi. Pasion hoina in khelna thuoh zoulou chienga siltung ahi. Lot hunlai inzong a gitlouna uh asangseng jiehin Sodom leh Gomorah khopi Mei leh Kaat in halvam in vut-le-vai suoh hi. Tua Pasion ma ahi eite Pasion. Ama Isrealte Egypt gam a suoh-le-sal tanna dinga Egypt mite tapa upapen thatchiet hi. Egypt sipai zousie Tuipi San a shibei a amite galzousahpa Pasion ahi. Kanaan gam enkhete thututna a Pasion muongjouloute gamdai a ashibei ua, Kanaan gam tungsalousa Pasion ahi (1Kor. 10: 6-11). Tuami ahimanin Nehemiah leh Daniel in, "*Pasion thupi leh jauhuoi*" ana chi hiel uhi (Neh. 1:5, Dan. 9:4).

Thuhun Tha a Ami Isrealte'n theipina nna aseplou man ua akiheisan Pasion ahi (Mt. 21: 42-44). Tua thuma Jentelte vauna dingin, "*Aziehpen Pasion in bamengdihtahte nangawn khawilou ahileh, nang zong ahing khawi tuon sih ding hi*" (Rom 11:21)

chin agen hi. Ahivangin, Pasion thukhauna pen a thu manlouna ga ahi lel a, Ama thu mang a kisiate adingin vang gimthuohna hun ah gawtna thupi thuoh sahlou ding hi (Kil. Bung 6-18).

iii) **Pasion hoina leh thukhauna apat zilkhiet ding:** Tampi gen thei dingte lah ah poimaw deu thum igenkhawm ding uhi.

i) **Pasion hoina kipahpi ding ahi:** Pasion guoljawlna natan zousie abawnpi aban ban in sim suhsuh inlan, silhoi bawl kizil in, ki thupi sahvawt sinlen, tuate sangin Pasion kunga kipahthu gendan kizil inla, adeilam bawl ding kizil in. Sam gelpa bangin, *“Ka tung a silhoi tampi abawl zousie ziehin Mangpa kungah bang ahiei ka pieh thuh thei ding? Hundamna nou ka la dinga, Mangpa min ka lou ding hi....Aw Mangpa dihtahin kei na suopa ka hi a....ka thuchiemte amite zousie masangah ka tangtun ding hi”* (Late 116: 12-14,16, 18) ichi ding hi.

ii) **Pasion thuozawhna ikipapi ding ahi:** Pasion in Ama deidan zuilou hun peisa leh tuhun ah zong a thuozawdan ngaisun in-hing paikhelou ahi a! a thuohzawhna thupidan thei inlan, midangte toh kikal ah Ama dungsut sawm inlen, a thuozawhna simmawh vawtsin (Rom 2:4-5).

iii) **Pasion’ thununna ikipahpi ding ahi:** Pasion thu imanlou mana a thununna thuo hi-a ikitheileh kisia in Ama kung zuon kia in. aman hing ngaidam mama ding hi (Isai.55:7). Pasion thununnapi itna thununna ahi-a, *“Ka ta, Mangpa thununna ngaidau sinlen, phaw hil a na um chiengin zong, lungke sin”* (Heb.12:5) achi thei in. Sam gelpa’n, *“Na danthute ka zil theina dinga, suhgenthei a kana um khu kei dingin ahoi ahi”* (Late 119:71) chie agenpen genpi vai.

Akhupsitna: Hun peisa a Pasion mizie itheidan bang chi bang ahiei? Pasion, itna leh lainatna a dim, iutdan dan a ium chienga zong hing deldel mai, hing suisui mai, hing chielchiel mai ahi ei? Pasion itna leh hepina hau, thuojou ahi. Ahivangin, a hepina leh

lainatnate ngaineu a imusit chiengin ama lungthana leh thangpaina itunga kholkhawm ihi chi thei vai. Mikhielte it Pasion ahi. Mikhielte hundam nuom Pasion ahi. Mikhielte siemtha nuom Pasion ahi. Ahivangin, mikhielpen a it mama laiin, a khelna ahuo hi chi ithei ding ahi. Pasion in mikhielte a it vangin mikhiel kisia, kihei, khelna kiheisan (khelna topsan) a ama gingtate bou ahundam hi. Hundam ihinuoh in Pasion lampi izui ei? Kivel chien vai. Pasion hing itpen athangpaina lampi zui kha ihizaw diei maw. Ama angsung ah kipelut vai (Rom 12: 12).

Dohnate:

- i) Pasion hina kibanglou nite bang ahiei?
 - ii) Pasion hoina ichite bang bang ahiei?
 - iii) Pasion hoina leh thukhauna apan zildingte bang bang adiei?
-

SIMMUN-5

PASIAN MINTE GENCHETNA

Thuchin ding : “*Kei Mangpa ka hi a, tua khu Ka min ahi, ka thupina midang kungah ka pesih dinga, Ka patat lawnate zong milim kungah ka pesih ding hi.*” Isai. 42: 8

Taangtel : Isai. 40: 18-31, 42:1-8.

Zillai in atup : Pasion minte Ama kigenna ahia, ahina zong ahi. Pasion leh amin theichet a ahina bukim tah a thei ding ahi.

THUZIL DING:

“Min” kichi ama tang in ading thei sih. Min in a min neipen agen hi. Tua ahiman in Pasion “*Minte*” ichi chiengin a min bou gen louin, “*Pasion mama leh ahina genkhetna*”, a silbawltheina leh thupina genna ahi man in Pasion minte a poimaw mama ahi. Mihingte’n vang min ngai tahtah inei ua, imin sun khalou zong itam uhi. Khangluite’n amin ngaiseng a paw zoulou zong mi aum hi, chia agen uh mi um hi. Khanglui lai in “*Hausate*” bangin amin a khaam ua, midangte’n min a utut uh phuo theilou uhi. Tulai invang, azawng ahau in min ngaingai a kihan nuom chi’n iphuo uhi. Pasion minte vang Ama hina genkhetna ahia, amin apawzou mama hi.

i) **Elohim**: “*Elohim*” kichi Hebru haam ahia, ei haam in “*Pasion*” chi’n ilou uhi. Thuhun Tha a akikimpi min “*Theo*” ahi a Grik haam ahi. Amin kipatna “*El*” akhietna “*thahat, silbawlthei, thupi, madawm*” china ahi. Hebru haam ah “im” a atawp chiengin khat sanga tamzaw (plural) genna azat ahi (Siem. 1:1-4, 17:1, 35: 11, Namb. 23:22, Danpt. 10:17). Tuaban a “*Elohim*” in Pasion A-Mithum kigawm zong agen hi. Tua banga Pasion thahat leh silbawlthei inei manin a hamuon huoi a, abithuoi mama a ikipah mama ding uh ahi.

- ii) **El-Shaddai:** “*El-Shaddai*” kichi Pasion minte lah ah amuonhuoi leh lungnophuoi mama ahi. El pen igensah hileh “*Shaddai*” kichi “*bangkim bawlthei*” ahilou leh, “*bangkima kiningching*” (almighty, all sufficient) china ahi. Tua ahiman in “*El-Shaddai*” ichi chiengin “*Pasion bangkimthei, Pasion bangkim a kiningching*” china ahi (Siem. 17:1-2, 49: 24-25, Eks. 6:3). Pa (Siem. 17:6, 28:3, 35:11, 48: 4, 49:25, Ruth 1:20-21). Pasion bangkim bawlthei leh bangkim a kiching hamphatna leh guoljawlna itan theina dingin “*I saguohna leh tahsapna*” kitheina a poimaw masa hi (Jn. 15:5).

Tuaban ah, a langkhat lam ah Pasion bangkim bawlthei chi in alungthahna leh thangpaina mulkimhuoina zong agen hi (Kil. 16). Pasion lungthahna leh thangpaina lama a thahatna leh silbawltheina, kiningchinna thuoh lou ding a Jesu Khrist aum poimaw hi (Isai. 6:1-8).

- iii) **Adonai:** “*Adonai*” chi “*Mangpa*” china ahi. Thuhun Lui ah 300 vei bang akilang hi. “*Adonai*” a kizat chiengin apu leh suopa kizopna bang a kizopna agen hi (Exo. 4:10, Vaih. 6:15, 2 Sam. 7:18-20, Late 97: 5, 114: 7, 135: 5, 141: 8). Ama i Mangpa ahiman in a thupieh zui a ana sepding ahi (Isai. 6:1-8).

Thuhun Tha a akibatpi Grik haam a “*despotes*” ahi a, akhietna (*syepe*) chia kilet ahi (1Kor. 6:19-20, Ephe. 5:17, 1Pet. 1:14-15, 2Pet. 2:1). Tatna man a leisa ihiman a Ama a ihina, hagu silpiehte a hing thuom a a nna sem dinga hing kithuopipa ahina agen hi (1Pet. 2:25).

- iv) **Jehovah:** “*Jehovah*” ahilou leh “*Yahweh*” kichi thumal Pasion minte lah a Thuhun Lui a kizang tampen ahia, 6, 823 vei akimu hi (Siem. 28: 13, Isai. 43: 11, Late 102: 27). Akhietna “*Mangpa*” ichi ahi. Jehovah kichi Hebru thumal ni (verb) “*havah*” kichi “*Um*” china leh “*chavah*” ama a “*Hing*” chi kigawma piengkhe ahi. A thumal khietna tahtah “*tangtawna kihenglou a hinga um gigepe*” china ahi. Late 102: 27 na a, “*Nang pen angai ngai na hi a, na kumte zong abei nga sih ding hi*” achi hi (cf. Exo.

- 3:14-15, 6:2-3, Epha. 4:24, 2Kor. 5:17). Tunuo a hepina hun a hundamna ding Isai in angenkhawl hi (Isai. 45: 22-24).
- v) **Jehovah toh kigawmkhawm minte:** Jehovah toh kigawmkhawm (compounded names) minte tomkim in enzuol vai:
- i) **Jehovah-Jireh:** Jehovah chipen Mangpa ahi ina chita a, “*Jireh*” pen “*mu, kilang, mukhawl, peding*” chi ahi. Jehovah-Jireh pen Mangpa’n i poimaw leh tahsap a theia hing peding ahi china ahi (Siem. 22: 7-14).
- ii) **Jehovah- rapha:** Jehovah-rapha chipen “*Mangpa’n asudam*” ahilou leh “*Mangpa sudampa ahi*” china ahi (Exo. 15: 26).
- iii) **Jehovah- Nissi:** Jehovah-Nissi ichi “*Mangpa ka puonlap*” china ahi (Exo. 17:15). Tuapen Mangpa ka guolzawhna leh hing guolzawpipa ahi china ahi. Mangpa’n tahsa leh hagau a imelmate hingzawpi thei genna ahi.
- iv) **Jehovah- M’kaddesh:** Jehovah-M’kaddesh ichi khu “*Mangpa’n asu siengthou*” china ahi (Lev. 20:7-8). Mangpa’n ama thu zui a hingte a thu tangtawn in kipumpiehna toh hing su siengthou hi.
- v) **Jehovah- Shalom:** Jehovah-Shalom kichi Mangpa imuonna (The Lord our peace), lungnopna, hamuonna, lemna ahi china ahi (Vaih. 6:24).
- vi) **Jehovah- Tsidkenu:** kichi khu Hebru haam ahia, ei haam in “*Mangpa idihtatna ahi*” china ahi (Jer. 23:5-6, 2 Khang. 5:21).
- vii) **Jehovah- Shammah:** Jehovah-Shammah kichi “*Mangpa tuanah um hi*” china ahi (Ezek. 48: 35). Kum 1000 gam a Pasian amite toh a umkhawmna ding genna ahi.
- viii) **Jehovah- Sabaoth:** Sipeite Mangpa ahiei mihonpite Mangpa china ahi (Isai. 6:3).
- vi) **El toh kigawmkhawm minte:** (i) El-Elyon, Pasian a sangpen ahi (Siem. 14: 19, Dan. 4: 2, 17) (ii) El-Olam, tangtawn Pasian

china ahi (Siem. 21: 33). (iii) El-Elohe Israel, Pasion Israel Pasion china ahi.

Akhupsitna: Pasion minte apan Pasion hina, thuneina, silbawltheina imu thei hi. Ama hina toh kituoh leh kilawm isah bang chiet in Mangpa Pasion phat leh patawi in Ama ibe ding uhi. Tangtawn Pasion leitung leh vantung leh a sung a umte zousie bawla kempa neite ihi hamphathuoina mama e maw! na ngaisun kha ngai tai?

Dohnate:

- i) “Minte” ichi bang genna ahiei?
 - ii) El-Shaddai ichi bang genna adiei?
 - iii) Pasion sangpen amin bang ahiei?
-

SIMMUN-6

JESU KHRIST ETTON DING AHI

Thuchin ding : *“Tambang bawl dinga hat na hi uhi, aziehpén Khríst in zong aketot a na zui dinguh, etton ding hing nuasie in eite taangin ana thuohta hi.”* 1Pet. 2: 21

Taangtel : 1Pet. 2: 18-25, Phil. 2:1-12

Zillai in atup : Khríst etton a Ama bang ding Khrístian hinkhuo siltup ahiman a Khríst batna a khang ding kizilsah ding ahi.

THUZIL DING:

Mihing bukim ahima bangin Khríst in mihing hina dinga Pasion dei bangtah hinna leitung ah hing nei hi. A thugen, mihina leh nasep ah ama eite etton ding bukim ahi. Khrístiante i pientha chiengin hinna tha Pasion batna nei ihiman un Khríst bang thei dingte ihi uhi. Khríst in eite zui ding hing nuosiet poimaw diehte I enkhawm ding uhi.

1. **Khríst a umdan ah eite etton ding ahi:** Khrístian hinkhuo siltup Khríst bang ding ahi (Rom 8: 28-30, Gal. 4: 19). Khríst hinkhuo leh umdan ibat na ding chi Li (4) igen ding uhi.
 - i) **Sienthouna:** Jesu Khríst pienken leh gamtatdan ah a siengthou hi (Heb. 4:15, 1Jn. 1:15-16). Eite zong siengthou dinga hat ihi uhi (1Thess. 4:7-8, 1Pet. 1:15-16). Hindan, neh-le-dawn, tep-le-muom, gen-le-sah, etnop, zahnopte nangawn ah i siengthou ding uhi.
 - ii) **Itna:** Itna ah Khríst i etton ding uh ahi (Jn. 13:34-35). Amain Pa Pasion a it a (Jn. 14:31), Laisiengthou a it a (Mt. 5:17-18), nuozuite a it a (Jn. 13: 1, 15:9), hattuom a it a (Eph. 5: 25-27), chi-le-nam khentuom lou in a it hi (Mt. 10: 21, Lk. 19: 10). A melmate nangawn a it a (Mt. 5: 43-48), tambang

itna nei din hing thumsah a (Jn. 17: 26), midangte itna in a dim hi (Jn. 11: 35, Lk. 4:40).

iii) **Ginna:** Ama Pa ah kinga in bangkim ah amuong hi. Eite ginna siampa leh subukimpa ahi (Heb. 12: 1-4). Pa a kinga in, "... *Keima thu hilou in, Nangma thu hizaw hen*" achi thei gige hi (Mt. 26: 39). Thumna a zong Pa ah akinga hi (Heb. 5: 7-9).

iv) **Thunuoilutna/ Kingaingiemna:** Thunuoilutna leh kingaingeimna ah eite etton ding ahi (Mt. 11: 28-29, 1Pet. 2:22-23). Kisahtheina, kamkha leh ki-letsahna ama a kilang ngei lou hi. Lei a pan Kross dong, michimawte a saina ah migitna in dim hi (Phi. 2:5-8, 2Kor. 10:1).

2. **Thugen leh haam kamsuo ah eite etton ding ahi:** Khrist a haam kamsuo leh thugen ah eite etton ding ahi. A thugen khiette thudih lah hi hepina in dim hi. Mihing bukim ahi bangin a lei (tongue) thuzaw zing hi (Jak. 3:2, Jn. 8: 55).

i) **Haam kamsuo:** A thugen ah pilvanga theisiem huoi tah in thu agen hi (Jn. 12: 47-50). Haam kamsuo a kupal puolou mi piching ahi (Jk. 3:1-2). Eite zong haam kamsuo a pilvang dinga hil ihi uhi (Ephe. 4:24-29, Mt. 12:37).

ii) **Thumna:** Thumna hinkhuo a etton tah ahi (Heb. 5: 7, Lk. 6: 12). Pasion Tapa hilhiel in Pa Pasion toh kithuo na dinga thumna a akipum ngah leh eiten zong ipoimaw zaw dieh uhi.

iii) **Zilsah leh Thugen:** Jesu Khrist thugen leh zilsahna nasep ah eite ading in etton ding ahi (Mt. 23:8, Jn. 7:16, 12:49). Khristianten thugen leh zilsahna i uangbawl mama ding ahi. Mangpa'n eite hing ngansie ahi chi manghil sih vai.

3. **A nasep zousie a eite etton ding ahi:** Khrist a nasep zousie ah eite etton ding ahi. Leitung nasep ah Ama khutsiem ahia, Joseph

nasep a seppi hi. Messiah ahina toh kisai in Pa dei bangin a um hi (Jn. 4: 34-38). Laisiengthou in, “*Pasian in Hagau Siengthou leh silbawltheina toh Nazareth Jesu sathau anu dan, Pasian in aumpi ziehin ama silhoi bawlin leh dawiin asugenthei zousie damsahin avah kawi hi chi nouten na thei uhi*” (Nasp. 10:38).

Akhupsitna: I Mangpa leh Hundampa Jesu Khrist hinkhuo enton in zui ding la chiet ding in Mangpan hing panpi leh i ut mama uhi. Tulai Khristian tampite umdan ah dembei, thugen leh haam kamsuo ah pilvang lou, nasep silbawl ah thadah hi hai. Jesu Khrist hinkhuo ah thadahna/ thasietna in mun neilou hi. Leitunga a taam sung teng nasepna ngen in dim hi. Mangpa hinkhuo etton ding a izil tamloute i teel khiet ahiman in zui isawm chiet ding uhi.

Dohnate:

- i) Khristian hinkhuo siltupte bang ahiei?
 - ii) Khristian hinkhuo siltup chi li (4) te bang bang ahiei?
 - iii) Mi piching thei theina khat gen in.
-

SIMMUN-7

TULAI TAH A JESU KHRIST NNASEPTE

Thuchin ding : *“Ka ta ittahte aw, na khellouna dingun tam thute na kung uah ka hing giel hi. Tualeh mi koi ahiei akhel taah leh, Pa kunga hing genpiehpa Jesu Khrist midihtat inei hi.”* 1Jn. 2: 1

Taangtel : Heb. 4:1-5: 1-19, 1Jn. 2: 2-6.

Zillai in atup : Jesu Khrist vantunga a kahtou nuu a a nasepte theisiem sah in, Pasion tate i hamphatna theisiem sah in.

THUZIL DING:

JESU KHRIST Pasion Tapa leitung a mikhielte tatkhietna nasep a sepjou nuu a van tunga peitou in maw um hithiet ahivawt sih hi. Ama bangkimbawlwthei, munteng a umthei, bangkim theisieng in vantunga a um kawm in nasep poimaw tampi anei hi. Tuate lah ah apoimaw diehte tamlou izil ding uhi. Tuate ahileh:-

1. **Khrist in Hattuum alamtu hi:**

- i) **Hattuum, a pumpi a bawl:** 1Kor. 12:13 in Khrist pumpi hattuum Hagau Siengthou in a lamtu chi hing hil hi. Tua nasep ah Khrist pen hattuum lutang ahiman in kem hi. Nasepte 2: 47 ah, hattuum hatna dia nasem Khrist ahi chi imu, Khrist Hagau Siengthou tungtawn in hundamloute hundam in a hattuum alamtu hi.
- ii) **Hattuum akem hi:** Khrist, hattuum lutang bep himailou in, hattuum lutang a vaihawmpa ahi (Kol.1:18). Aman a hattuum lamkai in atungah thuneina zousia a tang hi (Ephe. 5: 23-24). Mihingte lutang in apeina ding lampi akawmu in Khrist in a thu tungtawn in hattuum pei dingdan akawmu hi (Ephe. 5: 26).

- iii) **Hattuom a vah hi:** Michinteng in eima pumpi ikep a ivah bangin Khrist in A pumpi hattuom deithaw tahin avah hi (Ephe. 5: 29-30). Aman silpieh tuomtuom apiehte zong hattuom pichinsah na ding ahi (Ephe. 4: 11-16). Khrist nasep poimaw mama khat hattuomte (gingtute) pichinsah ahi.
- iv) **Hattuom, A pumpi susiengthou hi:** Khrist in a pumpi a thutah tungtawn a susiengthou a Ama leh Ama khu hattuomte thupi tah a a siltup ahi (Ephe. 5: 25-27). Ahing thumsahna zong tua ma ahi (Jn. 17: 15-19). Khrist siltup theiin Sawltah Paul in zong, *“Pasian thangsietnain ahi noute a dinga ka thangsiet. Pasal khat a dingin noute ka hing khaamta hi, aziehpem Khrist kungah noute nungah siengthou banga ka hing pieh theina dingin”* (2Kor. 11:2) chi ahi.
- v) **Hattuom, A pumpi silthawnpiate toh athop hi:** Hagau lam silthawnpiehte zousie kipatna bulpi Jesu Khrist ahi. Hagau Siengthou in akul bang bang in a semkhie ahizaw hi (Ephe. 4:8, 11-13, Rom 12:4-8, 1Kor. 12:4-11). Silthawnpiehte hattuom lamtouna ding, nasem dinga thopna ding leh michin Hagau lam pichinna dinga pieh ahi.

2. Khrist in Gingtute ahing thumsah hi:

- i) **Khrist hing thumsahna in gingtute hundamna bitna-kip-na agen hi:** Khrist i sih-le-tanga adinna lawsam hileh vang hundamna mangthang kiading ihi. Ahivangin tuabang hilou hi (Heb. 7:25, Rom 8:24). Gensahpa muonhuoi i nei a Ama ah ibit in ikip uh ahi (Jn. 10: 27-30).
- ii) **Khrist thumsahna in khelna zieha kizopna tan azawmkia hi:** Khrist eite hing gensahpa ahiman in ahamuon huoi mama hi (1Jn. 2:1-2). Gensahpa ichi tulai haam in, *“Ukil,”* midang khat sih-le-tanga gup toh gensahmi genna ahi. Pasian Tapa in hing gensah hamuon huoi seng hi (Rom 8:31-34). Khelna a ipuo chiengin i khelnate phuong in Ama kungah thuphatawi lei Aman hing ngaidam mama ding hi (1Jn. 1:7-9, Isai. 55:7).

3. **Khrist in gingtute ading tuom in naseh hi:**

- i) **Khrist in gingtute um nading vangam ah mun hing bawlsah hi (Jn. 14: 1-3):** Thupina mun, vangam ah Khrist in nang-le-kei ading in mun (umna) hing bawlsah hi. Ni-danglai suolam mite'n a tapate uh zi nei ding a um chiengin amau luo ding in pindan (room) hoi leh kilawm, nuomtah abawlsah jel ua tua bang bang ahi (Kil. 21 & 22).
- ii) **Gingtute gasuo dingin hing umpi hi:** Khrist in vangam a akaltou vangin gingtute nusia mailou hi. Hing umpi taw-ntung hi. Tua zieh in ama toh kizopna hoitah nei a i um chiengin i hinkhuo, Hagau ga leh nasep gasuona thupi hing pie hi (Jn. 15: 1-8).

Akhupsitna: Jesu Khrist Pasion Tapa in a hattuom it in a sisan in hingtan hi. Tua tatkhietna nasep azaw chiengin vantung ah kaltou in a pumpi, hattuom Hagau lam ann avaa in, susiengthou in, Hagau silpiehte a thuom in, apei nading lampi kawmu hi. Tua banga Mangpa nasep in nang ahing khoikha/ sukha ei? Khrist in a hattuom hing thumsah/ ngetsah hi. Hagau lam a nuatol a basam a na um chiengin zong Aman hing nusia lou in eite toh kizopna bawltha zel hi. Eite zong i khelnate'n Pasion toh ikizopna akitan sah leh i khelnate thuphatawi in a ngaidamna ngen vai. Pasion in thupina vantungah mun hing bawlsah a hamphat huoi hi. Tuami lua dingin ikiman tai? Luotah hinkhuo in na hing nai? Kivelpha in. a tawppen in, Mangpa a ding leh amin thupi nading in ga isuoh nai ki-enchien vai.

Dohnate:

- i) Khrist nnasep poimaw mama khat bang ahiei?
- ii) Khrist sih-le-tang a dinna lawsam hileh bang achi diei?
- iii) Pasion hing bawlsah hamphat huoi bang ahiei?
- iv) Ki-etchet ding achi bang ahiei?

SIMMUN-8

HAGAU SIENGTHOU A DIMNA

Thuchin ding : “*Tualeh zukham in um sih unlen, tuanah kidehzou louna aum hi, hinanleh Hagau adim in um zaw un.*” Ephe. 5: 18

Taangtel : Nasepte 2:1-4, 4: 23-31, 6: 1-8, Jn. 7: 37-39, Ephe. 5:15-20.

Zillai in atup : Hagau Siengthou akidimna bang ahiei, bang chi dim ding ahiei chi theichet sah ding.

THUZIL DING:

Laisiengthou in, “*Hagau a dim in um un*” chiin thupieh hingpia hi. Hagau Siengthou dimna pen mi khenkhat sawltah lian, Stephen, pastorte leh upate tan ding bep hilou hi. Pasion thupieh zui ding ahi. Gingtu mimal chiet dim ding, papite, nupite, leh piengtha zousie dim ding ahi. Hattuum in amite Hagau Siengthou dim a nei poimaw hi. Tuabang a umlou chiengin kilemlouna, gensietna, hazatna, milim biehna chi tuomtuom tam hi. Pastor, upa, missionarite, Nipi skul sangsyete, lapawl sate, skulpute a dim ding ahi.

- 1. Hagau a dimna bang ahiei?** Hagau a dimna ichi ihinna pumpi Hagau Siengthou thuzawna leh thuneina nuoi a um china ahi. Mi khenkhatten Hagau a dim ichi Hagau Siengthou a kan-aval atanbena dan in agel ahi. Tua sangin Hagau Siengthou in ihinna zousie thunei khuma adei bang bang a azat chinna ahizaw hi. A Grik thumal, “*Hagau a dim gige in um un, ahilou leh, Hagau thuzawna nuoi ah um gige un*” china ahi. Piengtha zousie tan thei hamphatna ahi. Penticost main vang ngah ding ahi. Penticost nua/zouin vang ngah ding hilou in kipumpieh sieng ding ahi (Rom 12:1-2, Nasp. 1:14, 2:1).

2. **Hagau a dim poimawna:** Kim-le-pam i et chiengin Khristian tahsa mitna in dim hi. Guoljou Khristian mu ding tawm hi. Khristian kipah leh nuomsa kitawm hi. Hunpi khat a hui tu-omtuom in hing mut chiengin tomang zelzel thei hi. Kimudana, kigensietna, kihazatna, chizatna in dim hi. Laisiengthou sim gige tawm, thummi tawm, thutahna leh chitahna ngiem seng. Mihing hinkhuo Hagau Siengthou thuneina leh thuzawna sanga athuzaw thei tam seng hi. Tua ahimanin Hagau Siengthou in dim chiet lei bei ding ahiman in apoimaw mama hi (Nasp. 1: 8, 2: 1-4, Ephe. 5: 18-20). Atomlam a gen in (i) khelna tunga guoljaw na dingin (Gal. 5: 16), (ii) nasepna a thahatna dingin (Nasp. 1: 8, 1Kor. 2:4, Nasp. 4: 31-32).
3. **Hagau a dimna ding lampite:** Hagau a bang chi dim ding? A lampi bang ahiei? Apoimaw tampi a um vangin chi 5 igen ding uhi.
- i) **Khelna thupha tawina:** Khelnate thuphatawin a ngaidamna tan poimaw hi. Khelna thuphatawi ichi chiengin khelna ngaidamna lampi ahi (1Jn. 1:9). Khelna ngaidam ichi chiengin khelna apan kisiensuohna ahi (1Jn. 1: 7, 2: 1-2). Pasion ngaidamna leh mihing ngaidamna poimaw hi.
- ii) **Khelna tawpsanna:** Khelna leh mawhnate thuphatawi ding bou hilou in tawpsan ding ahi. Khelna thupha tawi a tawpsan lou a manna bei ahi (Isai. 59: 1-2, Late 66: 18, Gal. 5: 16-18, 24, Rom 8:12-14). Khelna thuphatwai a bawlkia jel chipen kisialou china ahi. Kisiana panglou in ngaidamna umlou hi (Isai. 55:7).
- iii) **Kipumpiehna:** Hagau Siengthou in hing luodim a thuneina leh thuzawna hing nei theina dingin i mihinna pumpi Pasion kunga pieh poimaw hi (Rom 6:12-14). Kipumpiehna ichi chiengin Pasion chi chi kapom ding china ahi (Late 40: 8, Jn. 4: 34).
- iv) **Thumanna:** Pasion in thumangte kungah Hagau Siengthou

pieh ahi thu gen hi (Nasp. 5:32). Kipumpiehna zuite thumanna ahi. Kipumpiehna dihtah ah thumanna um teitei hi.

- v) **Muonna:** Ginna, tuapen muonna, zangin hundam in i um a (Ephe. 2:8), ginna in Hagau ah ihing uhi (Kol. 2: 6). Khelna thuphatawin, na tawpsan a, na kipumpieh sieng leh gintat ding muon ding ahimai hi. Pasion in a Hagau Siengthou in hing dimsah ding hi.
 - vi) **Khrist na lungtang ah kumpipa in pom in:** Nangma a pen koi khie in Khrist na lungtang sungah kumpi thunei pen in pangsah in (Jn. 6: 68, 1Pet. 3: 15, Gal. 2:20).
4. **Hagau a dimna gaate:** Hagau a dimte hinkhuo ah a louthei lou a kilang ding pawl khat um hi. Tuate tamlou i enkhawm ding uhi.
- i) Khrist batna eite ah kilang ding hi. 2Kor. 3:18, Gal. 5: 22-23 a agen bangan Hagau gaa chi tuomtuom 7 ei kipan akimu khe ding hi.
 - ii) Gentel leh phatna hinkhuo i nei ding uhi (Ephe. 5: 18-20). Pasion thupina pia in Ama phat leh patawina in idim ding hi.
 - iii) Hagau in Khrist thupina hingpe sah ding hi (Jn. 16: 14). Ama leh ama kipatawi Hagau khu Hagau dihlou ahi.
 - iv) Khristian guoljou hinkhuo hing pesah ding hi (Gal. 5: 16, 24). Khelna leh solna tungah guoljawna inei ding china ahi.
 - v) Khristian nasepna a thahatna nei ding in hing panpi ding hi (Nasp. 1: 8, 6:8, Mt. 10: 16-23).
 - vi) Hagau mangthai dingte itna hingpe ding hi (Mt. 9: 35-38, 1Kor. 9: 16-17).
 - vii) Kingaangiemna dihtah hinkhuo nei ding ihi (Ephe. 5: 21).

Akhupsitna: Hagau Siengthou a dimna hinkhuo na thei tai? bangchi leng dim ding chi zong i zil jouta hi. Hagau a dimlou hinkhuo zatpen gimhuoi, chintahhoui hilou maw? Mangpa'n a Hagau Siengthou hing dimsah nading in ikiluikhe ngap ding uai ma? Hinna tuihing ei apan luongkhia aumthei nading ahi (Jn. 4: 14, 7: 37-39).

Dohnate:

- i) Hagau-a dim ichi bang china ahiei?
 - ii) Hagau-a dim a poimawna zieh bang ahiei?
 - iii) Kipumpieh bang china adiei?
-

SIMMUN-9

HAGAU GAATE (THE FRUIT OF THE SPIRIT)

Thuchin ding : *“Hagau gaa ahileh, Itna, Kipahna, lungmuonna, thuohhatna, zainemna, hoina, gimumna. Thunuoi-lutna, kidehtheina, ahi, tambangte toh kikal dan a um sih hi.”* Gal. 5: 22-23.

Taangtel : Johan 12: 23-26, 15: 1-8, Mt. 7: 15-20, Gal. 5: 19-23.

Zillai in atup : Hagau gaa kichite piengtha Pasian Hagau Siengthou nei pouma in aneithe Khrist batna gaa ahi chi theisah ding ahi.

THUZIL DING:

Hagau Siengthou nasep leh Hagau gaa akibang sih hi. Hagau nasepte ichi chiengin Hagau in a nasep tungtawn liuliau a sepkhiette genna ahi. Hagau gaa ichi chiengin Hagau sungtenna zal leh eite kipiagna zal a hinna a gakhie hoinate ahi. Gal. 5: 19-23 ah tasah silbawltheina leh Hagau gaa kibat loudan imu hi. Tahsa silbawlte 17 apha a, mi-hing lui nasep leh utnate ahi. Hagau gaa ahileh Hagau Siengthou sungteen in hinna tha tungtawn a asepkhiet ahi. Hagau ga pen gaa (gaa hilou) Hagau gaa khat neizal a hoina chi 9te ahi. Amaute kikhen theilou a Khristian hinkhuo a gaa ding ahi.

1. Hagau gaa chi tuomtuomte: Gal. 5: 122-23 in Hagau gaa chi tuomtuom 9 ahivangin Hagau khat in hing zilsah hi.

i) Itna: Pasian itna, mahni angung khuolna umlou melmate it theina, itna piengthate bou in anei thei ahi (Rom 5: 5, Eph. 3: 19). “AGAPE” itna ahi.

ii) Kipana: Buoina umlou zieh a nopsahna genna ahi sia, lungkhamna, buoina, hasatna, shina, dahna, lah a zong Pasian a lungkimna zal lungsima kipana genna ahi (Heb. 3:

17-20, Phil. 4: 4).

- iii) **Lemna:** Pasion deidan toh kituo a um zal a lungsima hamuonna, lungnopna, genkhiet theilou lungkimna ahi (Phil. 4: 7, Kol. 3: 15).
- iv) **Thuohhatna:** Thuohhatna ichi thuoh zohna leh lungduaina genna ahi. Lungthah ha, lungthahna lam a zekai china ahi. Thuhlou dinga kidehzawna zong ahi (Exo. 34: 6, 1Pet. 2: 23).
- v) **Zainemna:** Migitna ichi nunnemna leh siemna chitna genna ahi. Pasion in hepina tang taahloute hing hepina a migitna akilatna ahi (Tita 3: 4, Epha. 2: 7). Veng-le-pamte lah a mopuohna ahi.
- vi) **Hoina:** Hoina kichi silhoi deina leh silhoi sep utna genna ahi (Nasp. 9: 36, Lk. 10: 30-37).
- vii) **Ginumna:** Muonhuoina in chitahna leh muonngam huoina, kingah theina agen hi (Heb. 3: 2-5).
- viii) **Thunuoilutna:** Thunuoilutna ichi lungnemna agenna ahi. Ki-letsahna leh kithupisahna toh kilehbul ahia. Poidkhwilouna hindan agenna ahi (Mt. 11: 28-29, Namb. 12: 3, 1Pet. 2: 21-23).
- ix) **Kidehtheina:** Kithuzawhna leh ki-tuhtangzawhna (self control) genna ahi. Ann duhlou, ahivanga kidehzou, lungthah thei ding hinapia lungthahlou china bang ahi (1Kor. 9: 25-27). Bangkima kithuzawna genna ahi.

2. Hagau Gaa toh theidia kilawmte:

- i) **Gasuona apoimaw hi:** Mikhiel i pientha nua a Pasion in leitung a hinbg koi laiin apoimawna mama khat gasuo ding ahi. Mangpa'n, "*Keima a um ba galou pouma apaimanga aga pouma asusiengthou zel hi, aga tam semna ding in*" (Jn. 15: 2). Tualeh Mangpa, "*Ahing ga leh ahoi dinga, hinanleh ahing ga taah sih leh na phua na ding hi*" achi hi (Lk. 13:

- 9). A gasuo louten a gasuote hamphatpi den lou ding hi. Gaa suo lou a Pasian deisahna tan gige lamet huoi vawtlou ahi.
- ii) Gaa I hina genkhietna ahi:** Mangpa'n, "... *Tuaziehin am-aute aga in na thei ding hi*" ana chi hi (Mt. 7: 20). Pienthana dihtah kilatna hinkhuo a gaa hoina suona ahi. Apawlawnga kilimbawl ahoi a, ahivangin akilatna tahtah khu ga hoi leh ga hoilou ahi (2Kor. 5: 17).
- iii) Gaa ichi phattuompi ding ahi:** Mt. 21: 34 nain, "*Tuachin'n aga law ahun ding kuonin, asuohte aga la dingin huon bawlmite kungah asawl hi*" chi imu hi. Gaa in Pasian ipatawi dinga (Mt. 5: 16), eima phattuomna ding ahiei, tua bana midangte adia guoljawlna ihina ding ahi (Siem. 12: 3).
- iv) Gaa kipatna Pasian ah ahi:** Gaa kipatna leh gaa suohtheina Pasian a umna ahi (Hos. 14: 8, Jn. 15: 4). Pasian leh i Mangpa Jesu Khrist toh kizopna a hoi chiengin ga kisuo theipan ahi (Jer. 17: 7-8, Epha. 3: 17-18).
- v) Gaa kichi kisuonsawna ahi:** Pasian in a silsiem annte louhing leh ganhingte amau chi umdan bangchiet a gaa dingin thu a pie hi (Siem. 1: 11, 25). Haichi ichi a gaa sungah a tang (seed). Haichi in gaa aneilou leh, tang neilou suonsawn neilou ding china ahi. Mihingte zong Hagau lam ah tua bangma ahi hi.
- 3. Hagau gaa isuo theina ding lampite:** Jonah 12: 24 nain, "... *Butang khat lei a kieh a, ashi sih leh, ama tangin a umden a hinanleh ashi chiengin gaa tampi ahing suong hi*" chiin a gaana ding lampi kichientah in hil in ium uhi. Mi tampite mihing lui, pienken mihing a shisan lou zieh un Hagau gaa suo theilou uhi. Mihing lui Khrist toh akikilbeh sihleh tahsa silbawl theinate bou in i gaa ding uhi (Gal. 5: 19-20). Mihing lui ei a ashi leh shilou chiemtena bang gaa in i gaa ei chi ah akilang pen hi. Mihing tha Jesu Khrist a siemtha pen bou in Hagau gaa kithei hi.

Akhupsitna: Tuin eima ki-enchien in, Hagau gaa inei ei, ahilouleh tahsa silbawltheinate gaa ihizaw diei maw? Pasion in gaa suo dingin hing dei in, eite ah gaa asui gige ahi chi manghil sihvai. Pasion dei banga gaa pen Pasion in thupina a tanna ahi, a gaate'n zong hamphatna i tankhah law a, midangte a ding in guoljawlna ihi phanalai hi. Pasion hepina a Hagau gaa dingin mihing lui Khrist toh kilbet in Ama ah hing vai.

Dohnate:

- i) Hagau nasepte ichi bang ahiei?
 - ii) Hagau gaa ichi bang ahiei?
 - iii) Laibu in ki-enchien ding achi bang ahiei?
-

SIMMUN-10

HAGAU SIENGTHOU SILTHAWNPIEH TE

Thuchin ding : “*Michin in Pasion hepina chi tuomtuom kem mi hoitah bangin, silpieh na mu bang bang un nna kiseppiehtuo chiet un.*” 1Pet. 4: 10

Taangtel : Rom 12: 3-8, 1Kor. 12: 4-11, Eph. 4: 11-16.

Zillai in atup : Pasion in a thawn a ang piehte bang bang ahiei ma chi thei kawma, Ama deibang banga, amanpha theipen a zah chiet itup ding uh ahi.

THUZIL DING:

I Mangpa vantunga apeikuon lai in, akiphut chil pan hattuumte khu, miel thuneina toh kidou pai ding ahijieh un, Hagau lam silthawnpieh tuomtuom toh athop ding khu adeisahna lienpen ahi. Laisiengthou in, “*Tunglam a a kaltou lai in, mat a umte sal in apui a, tualeh mihingte kungah silpiehte apieh hi*” (Eph. 4: 8) chin ang hil hi. Tua silthawnpiehte khu Hagau Siengthou tungtawn in ahawm a, Ama deina bangin a semsuo sah hi. Pasion bangkim bawlthei akipatsa silthawnpiehte panglou in Hagau lam galdounate zaw ding guol hilou hi. Tambang silthawnpiehte umlou hileh, i Hattuum zong simlei-vai a kipawlkhawmna khat abang giep ding hi. Hagau silthawnpiehte genna in thumal ni (2) akizanga, “*pneumatika*” ahilou leh “*charismata*” ahi (1Kor. 12: 1,4). “*Pneumatika*” akichi chiengin, “*Hagau akipatsa bang amakhat mu*” china ahi. Khumte khu mihing pienken/ pienpi a neithe ahi sih a, Hagau a pienthana neite tunga Pasion in ahepina zala apiehte ahi uhi.

1. Silthawnpieh chi tuomtuomte: Laisiengthou a imu bangin silthawnpieh chi tuomtuom 24 vel apha hi.

- i) **1Kor. 12: 8-10 ah,** “Pilna silpieh, theina silpieh, ginna silpieh , suhdamna silpieh, sillamdang bawltheina silpieh , thugentheina silpieh (thumanvang gentheina) Hagau dih-

le-dihlou khen kah theina silpieh, ham chi tuomtuom a haam theina silpieh, haamte hilchien theina silpieh” ahi hi. Agawm khawmin 9 apha hi.

- ii) **1Kor. 12: 28 na** “Sawltah, thugen mite, mi thuhil mite, sil-lamdang bawlte, suhdamtheinate, panpitheinate, vaihawm siemna leh haam tuomtuom siemna” apie hi. A gawmkhawm in 8 apha hi.
- iii) **Epha. 4: 11-16 ah**, akigensate ban ah, “tangthupha (Khan-tanhoi) gen mi, Pastor na leh naseptheina” a belap hi. Aki belap 3 ahi.
- iv) **Rom 12: 6-8 ah**, “vauhil/ taihil mi, silpieh pemi, vaihawm-mi, hepitheimi” belap ahi a, aki belap 4 toh agawmkhawm in 24 vel a sim thei ahi.

2. Silthawnpiehte khu thuneina tungtanga pieh ahi.

1Kor. 12: 11 ah, “Hinanleh tuate zousie khu Hagau khat ma in, Ama deina bangin mimal chinteng kungah hawmin asem hi” chi imu hi. Hagau Siengthou silthawnpiehte khu mihing kipieh sawn thei leh deitel thu a tan/ nga ahisih hi chi aki chien mama hi. Naspepte 2:1-4, 8: 14-17, 10: 44-48 in a tuom gen hilou in Judate’n Pentikos Ni a a Hagau tan bangbang uh Samari mite leh Jentelte tunga atunna agen hi. Mi chituom tuomte kunga Pantikos Ni tung ahi lel hi. Theikhel ding ahi sih hi. Hagau Siengthou in gingu zousie Jesu Khrist pumpi (tahsa pum) ah Ama deina munmun ah akoi a, hoi asah bangbang silthawnpiehte toh athuom ahizaw hi. Ephe. 2: 21-22, Hagau silthawnpiehte pieh ahina pen Pasian thuneina tuom liu-liau ahi. A thuneina tungtuonga adeitelna munmun a akoi leh apieh ahi. Tami khu hattuum lamtouna dinga thopna ahi a, mimal kiletsahpi ding ahi laizang sih hi.

3. Silthawnpiehte phattuumna ding a pieh ahi

Pasian thu in, “*Hinanleh phattuum chietna dingin michin kungah Hagau nasep kilahna pieh chiet ahi*” chin ang hil hi (1Kor. 12:7). Hagau silthawnpiehte Khrist tahsapum leh Hagaulam hinna bawlhoina ding leh khanna dinga, a phattuompi dinga pieh ahi. Gingu khat akibelap leh silthawnpieh khat, ama a dinga belap zel ahi a, khum khu “Pumpi” in aphattuompi ding ahi. Mihing tahsa hienge lah a, a panna bei umlou bangbang ahi a, a phatuomlou zong khatbeh auplou ding khu Pasian deidan ahi. I pientha chienga Mangpa Hagau Siengthou in i Mangpa Jesu Khrist tahsapum sunga ang baptis lutpen (1Kor. 12: 13) gotmun-meidil pumpelna ding bep hilou in, “*Jesu Khrist tahsapum*” adinga panpitu ding leh a guoljawlna ihi theina ding ahi. Jesu Khrist “Pumpi” khu akimutheilou hattuom eite i umzieh ua, Hagau Siengthou itante un asuhhat a, aphattuom sah semsem ding ahi.

4. Hagau silthawnpiehte lunggul ding ahi.

Pasian thu in, “*Hinanleh, silpieh hoipente lunggul zaw un*” chin ang hil hi (1Kor. 12: 31). Hagau silthawnpiehte lah ah bangpen itang kha ei chi khu theichet ding ahi. Tuaban ah silthawnpieh khat maaimai itan ding uh ahi sih a, Pasian adinga phatuom tah akizahna dungzui a atamzawsem neithe i ahi. Na nasepna, na dinmun leh mawhpuohnate dungzui in, silthawnpieh dang zong na poimaw bangbang in ngen in, Khrist pumpi lamtouna dingin Pasian in hingpe thanuom taluo ahi ziehin, thum in (Mt. 7:7). Sawltah lian Paul in, “*Thugen theina silpieh athupipen*” ahi a, lunggul dingin ang zil sah hi (1Kor. 14: 1, 39). Mt. 25: 14-30 isim leh khenkhatte talent khat (1) pieh in a um a, akhente Ni (2) pieh in a um a, aban ah nga (5) tan pieh zong aum ahi chi imu thei hi. Talent 5 mupan 5ma apungsah a, 2 mupan 2 ma apungsah a, 1(khat) mupan pungsah lou in a phuolmang hi. I pientha tunglai in talent 1(khat) ahei, 2 ahei ihi mai thei. Adangte akul-le-poimaw bangzel in Pasian thupina dingin ngen in.

5. Silthawnpiehte khu aneitu adinga akihun chet a pieh ahi.

Paul in, *“Hinanleh michin in Pasion apat silpieh tuom chiet inei uhi. Mi khat in silpieh khat, midangin silpieh tuom khat anei hi”* (1Kor. 7:7) na ah agen hi. Jesu Khrist gingta zousie in silthawnpieh anei chet hi. Koima piehkhahlou aum sih hi. Vaihawmsiemna silthawnpieh neipa in, thugen siemna anei sih hi. Lamdang isah lou ding ahi. Hagau Siengthou in michin akituopi bangzel in silthawnpieh pechiet ahi chi ithei ding uh ahi. Pasion lugnsietna zalin silthawnpieh tamzaw leh thopna itan leh ikipah ding ahi. Tam silpiehte khu eima mimal leenggam kehletna dingin izang sih dinga Pasion leenggam kehletna dinga izatchiet ding uh ahi.

6. Silthawnpieh ineipen izat ding ahi.

“Nangma a um silpieh thumavang genna a pieh ngaisahlou in um sin” chin Pasion thu in ang hil hi (1Tim. 4:14). Mi khenkhat in midangte tunga minthangzoulou leh kilang zoulou akisah zieh un, silthawnpieh anei pen uh zanglou in koidap theizel uhi. Tambanga silthawnpieh zahlou a, aki koidap chiengin ahciem sih a, a mol thei a, tuaban ah a kilahsahkia thei hi (Mt. 25: 28).

7. Silthawnpieh inei khu suhpung ding ahi.

Laisiengthou in, *“Tuaziehin na tunga ka khutngap zieh a Pasion silpieh nangma a um mutkuong dingin ka hing theisah kie hi”* chin agen hi (2Tim. 1:6). Pasion leenggam a dinga apha tuom theipen a zat dinga athawn a hing kipie ahia, kitathiem akhantou-sah ding ahi. Vantung a um Pasion akipat athawn a imu ahiziehin, hoitahnoua kep ding, bawlhoiding leh khansah i sawm nget nget ding ahi (Kol. 1: 29).

8. Silthawnpieh zahna a pilvanna dingte.

Tami silthawnpiehte inei ukhu Hagau mi hina ahi paituom sih

hi. Pasion Ta hina chiemtena ahizaw hi. Akizang khiel paipaite tomkim in envai:-

- i) **Haamtuom a ham:** Pentikos Ni hamtuom zanga hamte, aza kha te'n a haam uh athei uhi. Haam tuom a mi khat in thu agen a, aza te'n atheilou uh, a haam pen (agen pen) inzong atheilou pen khu Pentikos Ni a toh kibanglou ahi ziehin pilvang ding ahi (Nasp. 2: 1-13). Van sawltahten mi ahoup chiengun, amite haam mama zangin ahoup uhi.
- ii) **Suhdamtheina:** Laisiengthou in nei nailoute leh mission fieldte ah Pasion thu leh asil lamdang bawltheina namdet nadingin, tambanga suhdamtheina tungtawn a hing um ahi ding ahi (Jak. 5: 13-18). Ei Khut tungtawn lou in zong Pasion in pha sahleh adam ding hi. Eima silbawl ahi sih a, Pasion in eite kht tungtawn a nna aseph ahizaw hi. Sil lamdang zong, tamte ma bang ahi.

Akhupsitna: Hagau silthawnpieh ichite pienpi kigenna, kivahna leh talent maimai ahi sih hi. Pasion in atate tunga adeisahna a apieh liu-liau ahi. Tam khu Jesu Khrist tahsapum (hattuom) lamtou nadinga thopna ahi. Tami silthawnpieh inei bangbang khu Pasion minthanna ding, Jesu Khrist i theipina (witness) panna dinga zahdan siem taha izah ding ahi.

Dohnate:

- i) Silthawnpiehte lah ah athupipen bang ahiei?
 - ii) Silthawnpieh khu bang chiemtena ahiei?
 - iii) Silthawnpieh akizang khiel thei deute bang ahiei?
-

SIMMUN-11

SOLNA LEH ZE-ETNATE

Thuchin ding : *“Ze-etna thuo teitei mi khu ahampha hi, aziehpen etkhieha a um zou chiengun Mangpa ’n Ama itte kunga pieh dinga achiemsa hinna Manglukhu asang ding hi.”* Jakob 1:12

Taangtel : Siemchilbu 3: 1-7, Mt. 4:1-11, Jak. 1:12-15.

Zillai in atup : Solna leh ze-etnate theichet a, tami solna leh ze-etnate a puolou dinga zilsahna ding ahi.

THUZIL DING:

Solna kichi khu Pasian tate’n i tuochiet i theisiem mama khat ahi. Pasian Ta hichietchiet nanleizong a tuohtam deu leh a tuohtom deu zong a um hi. Mi koizong tami solna apat a peng tuom a um sih hi. Adam, Lucifer leh i Mangpa Jesu Khrist nasan zong sol in a um uhi. Tambang ahijiehin i Mangpa’n anuozuite thum dingdan azil sahna ah, *“Solna ah hing puilut sinlen, mi gilou lah apat hing hundam zaw in”* chin agen hi. Khanglaite zong khu solna tuoh tam mama te ihi uhi. A haatna uh Mangpa tunga kinga te’n a thuoh zou ua, Mangpa a kingalou te’n athuoh zou sih uhi. I lutungah vasa leng ding i khaam thei sih ua, hinanleh i lutunga bu abawlding i khah thei uhi. Solna a puate khu, azaw zou ding uh hi giagua a, zoulou ana hilel uh ahi hi (1Kor. 10: 13).

1 Solna kipatnate:

- i) **Ahilou lam ah:** Solna khat poupou khu Pasian a kipan ahi ngai sih hi (Jak. 1: 13). Laisiengthou in siengthou tah leh kichien tah in ahing hil hi. Mi siengthou Job toh kisai ahilevang, Pasian in Setan kungah phal leh phallou chieng nei in akoi hi (Job 1: 12, 2: 6).

ii) **Ahiam ah:**

- a) Setan ahi (Mt. 4: 1). Setan in i Mangpa Jesu Khrist a sol hi.
- b) Tahsa ahi (Jak. 1: 14). Mihing lui, solna zousie a utna apuimang a um ahi. Tam khu lam thum in akilang thei hi.
 - i) Tahsa utna apan ahi (1Jn. 2: 16)
 - ii) Mit utna apat ahi (1Jn. 2: 16)
 - iii) Damsung thupina limte apat ahi (1Jn. 2: 16).
- c) Lawm hoiloute apat ahi (Thupilte 1:10, 1Kor. 15: 33).
- d) Khristian lawmte apat ahi (Mt. 16: 22-23). Peter tung-tawn a Setan solna ahing lut lain, i Mangpa'n "*Setan, ka nualangah pei in*" achi san hi.

2. **Solna siltup khu bang ahiei?** A lampi a khen nen lei, solna siltup thum a um hi.

- a) **Ginna theichetna ahi:** "*Ka unaute aw, ze-etna chi tuomtuom natuoh chiengun, lungnopna nengin ngaisut un*" chi ahi (Jak. 1: 2).
- b) **Ginna pichinna ding ahi:** "*Hinanleh bangma tasamlou a na pichin ua, na bukim theina ding un, thuohhatna in sem bukim heh*" achi kia hi (Jak. 1:4).
- c) **Thumanna etchetna ahi:** Abraham in a tapa Isak maitam a alatna dinga thupieh amuna ah thumanna etchienna ahi dan aki muthei hi (Siem. 22: 1-12).

I Mangpa Pasian in, i nachitahna leh kipiehzawnate theikchieh a a umtheina dingin ahing ze-et zel hi. A thu a gen pen anuom a, a tahtah a i Mangpa Pasian izat leh izatlou khu, mun hahsa tah a i um chieng ua, i gup ngam leh i gup ngamlou ah ahing kilang dohzel hi (Siem. 39: 6-12, Dan. 1:8).

3. Solna lampite:

- i) Tahsapna leh zawnnate tungtawn in ahing um thei hi (Thupilte 30:9).
- ii) Hausatna leh kiningchinnate tungtawn in ahing um thei hi (Thupilte 30:9).
- iii) Leitung thupinate I del zieh un zong a hing um thei hi. Balaam in (Kisimna Bu 22: 17a) a asil tuohte apat imu thei hi.
- iv) Lungkimna leh kingaisietnate tungtawn in ahing um thei hi (Late 42: 11).

4. Solna chi tuomtuomte: Solna chi tuomtuom a kilang deu leh a tualleng deu te enkhawm vai aw.

- i) **Gintatlouna:** Mi siengthou Job khu a bieh Pasion hamsi-etkhum a shisuh mai dinga sol in a um hi (Job 2: 9).
- ii) **Ginmaw thu:** Vansawlsieng te'n ana dop dingin gintatna thu zieh in, I Mangpa Jesu Khrist khu Jerusalem Gentel tungvum apatsa diengkhe dinga sol in a um hi (Mt.4: 6). Eima leh eima kithat dingin solnate zong tambang ahi hi.
- iii) **Leitung pasien be dinga solna:** Setan in I Mangpa Jesu Khrist kunga, "*Khupboh a na hing bieh leh tamte zousie ka hing pe ding hi*" (Mt. 4:9) achi hi.
- iv) **Ki- uohsahna:** Nebukanezzer in, "*... Tami Babylon thupitah khu leenggam innpi dinga ka silbawltheina haata leh ka thupina zatatna dinga, ka lamdoh hilou ahiei ma?*" achi hi (Dan. 4: 30). Eite lah ah zong mi ki-uongsah leh kisiel a um leng hina lou ama!
- v) **Leitung nopna khiehlana:** "*.... Demas in tulai Leitung a it mama ziehin Kei ang taisanta a, Thessolonika khuo ah apeitahi*" (2Tim. 4:10).
- vi) **Thunei utna:** Simon Magas in Hagau Siengthou silbawltheina adei sengseng a SUM in a leisawm hi (Nasp. 8:19).

Tulai inzong thuneina leh silbawltheina tambanga sui itam uhi.

- vii) **Khovel leh khotang hinkhuo khiehlna:** Lot zi dimun ahi (Siem. 19:1-26, Lk. 7: 32).
- viii) **Du-amna/ Huoiamna:** Akan (Josh. 7:1-24).
- ix) **Zeh tankhielna:** Numei leh Pasal ki-etlahna khelna ah Solomon (Neh. 3: 26) David (2Sam. 11: 2-4).
- x) **Sum-le-pai deigawna ah:** Judas Iskariot (Jn.13: 21-30, 1Tim. 6:6-10).
- xi) **Ki niemkhietna dihlo:** Ngia hinapi b elam vun sil (Mt. 7: 15).

5. Solna chi 2 te:

- i) Hamphatna pang lou a kipiehlut mengmeng khu khelna ahi pailien hi (1Tim. 6:9, Thukhente 14: 1-20, 16: 1-20).
- ii) Tam solnate a doutu a ipanna khu in Pasian a patoi a, i ginna uah khanna ang um a, piching hinkhuo ang gasuo a, i thumanna a genchien hi (Jak. 1:1-4).

6. Solna zawthei dingdan lampite:

- i) Pasian kunga muonhuoi a panna (1Kor. 10:13, Jak. 1: 12, Kil. 3:10).
- ii) Pasian thutah Laisiengthou a kingah in (Mt. 4:1-11).
- iii) Khrist in ang thumpina geldoh zel in (Lk. 22: 31-32).
- iv) Mimal thumna in (Mt. 26: 41).
- v) Taisan in (2Tim. 2:22), Joseph ma bang in! (Thupilte 4:14-15).
- vi) Dou tahtah lei (Jak. 4:7), hing taisan ding hi.
- vii) Pasian in taikhietna ding abawl lampite zui lei (1Kor. 10: 13).

Akhupsitna: Solna ichi mi zousie in atuoh chiet ahi. Khristiante'n solna tuoh ding ka hi chi theisah a koi ding ahi. Hun peisa a ikizatna dihoute ma solna ituohna ding hingal ahi. Tuatē ma i tangpan ding, idou ding ahi chi manghil sih vai. Pasion in jawna Khrist tungtawn a hing bawlsah man in Ama thupina ipie uhi (1Kor. 15: 57). Khrist tungtawn in khelna, shina leh Setan tunga jawna inei khu theizing vai. Khelna nuoi akitulut khah ding kiveng gige in um vai. Phukha phut abailam a, ama pawn zong mangpai lou ahi aw! Na khel khah leh Pasion kungah thuphatawi inla, kisia-kiheisan inla, tawpsan den inla, a ngaidamna ngen in. hing ngaidam mama ding ahi (1 Jn. 1:9, Isai. 55:7).

Dohnate;

- i) Solna siltupte bang ahiei?
 - ii) Pasion taten ituochiet ding bang ahiei?
 - iii) Solna apuote bang achi ding uai?
-

SIMMUN-12

HINKHUO A PASIAN DEIDAN ZUI DING IN

Thuchin ding : “*Aw Mangpa Na thuguotte zuidan hing zilsah in, tuahileh atawp tanin ka zui thei ding hi.*” Late 119: 33

Taangtel : Thupilte 3: 1-8, Late 37: 1-40

Zillai in atup : Pasion deidan hinkhuo a thei a lamzang leh tuophatna tang ding a pilvang dinga zilsah ding ahi.

THUZIL DING:

Khristiante vang ideidan, ei nopsahdan leh ei poimawsah dante zui a hinkhuo zat ding hilou in Pasion deidan zui dingte ihi. Ei theidan a hoi a kilangte bang zong solna leh lampielna lampi hithei hi (Thupilte 14: 12, 16: 25). Jesu Khrist hinkhuo i etchiengin Pasion deidan bukim zui ahi a, eite etton ding ama ahi (Phil. 2:5-11, 1Pet. 2:21-23). Pasion deina theia, Pasion in mawpuona (duty) ahing piehte theisiem a sep bukim ding khu imawpuohna ahi (Josh. 10:7, Jn. 17: 4). Pasion kunga eite hinkhuo a siltup theichet imawpuohna ahi. Pasion deina lampi itheina ding lampite zilkhawm vai. Tuate ahileh:-

1. Pasion in mi zousie a dingin sil guot nei ahi:

- i) ***Pasion in amite ading gelkholsa nei hi:*** Tuapen i mihina, talent, kizattheina toh kituo hi (Epha. 2:10).
- ii) ***Pasion in michin ading nasep ding tuomtuom gelkhawlsa in anei hi:*** Tuami theichien lei i sepna khat pou pou a kilawching ding hi (Heb. 12:1, Kol. 4: 17, 2 Tim. 4:6-8).
- iii) ***Pasion in ei ding a gelkhawlpen ei ading liu-liau ahi:*** Tuamun itun khah leh i nasep ah lawchinna um ding hi (Late 32: 8).
- iv) ***Pasion gelkhawlpen bukim mama hi:*** Pasion in maban gamlapi hing mukhawlsah louin kal khat zou kal khat in

hing pui hi (Late 37: 23).

- v) ***Mangpa'n agelkhawlna a tangtawn in hing makai ding hi:*** Isai. 58: 11 ah, “*Mangpa'n hing pui gige ding*” chi'n agen hi. Mangpa puina pen eite'n itawpsan sih pou leh hing tawpsan ngaingai lou ding hi (1Thess. 5: 24, 2Tim. 2:13).
- vi) ***Pasian gelkhawlsapen kichien in kawh tuom nei hi:*** Isai. 30: 21 ah, “*Na zietlam uh ahiei na veilam uh ahiei a na pieltah chiengun, tami lampi ahi tanah pei un, tami zuiun chi'n na nualang ua pat na bil un aw khat na za ding uhi*” chin hing hil hi.
- vii) ***Pasian in agelkhawsate dong ding in hing dei hi:*** Sam gelpa'n, “... *Ka peina ding lampi hing theisah in, Aziehpén ka hinna in nanglam ang entou hi*” chiin agen hi.
- viii) ***Pasian deidan eite ading in ahoi penpen ahi:*** Rom 12: 2 ah, “... *Pasian deilam ahoi leh pomtah leh hoibukim bang ahiei chi na thei chienna dingun*” chi Pasian thu in hing hil hi. Ei deidan sangin Mangpa deidan ma hoi pen ding hi.

2. **Pasian deidan theitheina ding lampite:** Late 37 leh Thupilte 3:5-7 ah kichien tahin akigel a zui isawm ding uhi.

- i) ***Mangpa a muonna koi ding ahi (Late 37: 3, 32: 8, Thupilte 3:5a):*** Pasian silbangkim a muontham ching ahi. Ama nang ah lunglut mama hi.
- ii) ***Nangma mimuon ngamna koi khie in (Thupilte 3:5b):*** Mangpa deidan zui ding teelzaw inlan kipapi in (Late 37: 4).
- iii) ***Mangpa kungah na lampi nga in (Late 37: 5, Thupilte 3:6a):*** Pasian in ei-le-ei ki it sangin hing it zaw a, ei leh ei i kideisah sangin hing deisah zaw hi. Ama ah bangkim a kingah ngam huoi mama hi.
- iv) ***Pasian panpina pomkichien ngam in (Thupilte 3:6b):*** “*Aman na lampite atangsah ding hi*” chi pomngam ding ahi.

- v) ***Mangpa ah muong inlan, Ama ngah ngitnget in (Late 37:7)***: Pasion in hing pui ding in angchiem hi. Ahivangin, tu leh tu a adeina hing theisah pailou thei ahi. Tua ahiman in ngah kinken poimaw hi.
- vi) ***Pasian deidan pomngam dingin kiluikhie in (Thupilte 3:7, Rom 12:1-2)***: Eite Ama deidan pomdinga kimansa a i um ding ahi. Lungsim det neiloute lawching theilou uhi (Jak. 1:6-8).
- vii) ***Mangpa muong inlen, gilou taisan in (Late 37: 34)***: Leitung toh kikhenkhia a niahna zousie apan kisuhsiengthou ding ahi (Rom 12:3, 2Kor. 7:1).
- viii) ***Mangpa ngah in Hagau lam lungsim puo in (Late 37: 34)***: Mangpa ngah chiin Mangpa amuonngamna agenna ahi. Laphuotupa'n "*Ama makhel sinlen, bangteng hingtung inzong*" achi thei gige ding ahi.
3. **Pasian deidan theichetna dingte**: Pasion in bangchi bangin hing theisah diei? bang ka chi thei theidiei? chi thei ahi. Tangpi a zatthei khenkhat igen ding uhi:
- i) ***Pasian thutah Laisiengthou thu pansan in***: Pasion in a "aw" hilou in a thu kige; i pansan in mite houpi hi (2Tim. 3:16). Ama toh kithuona hoitah inei chiengin sie-le-pha theina pansan inzong hing houpi thei hi. Lungsim a pieng tengteng Pasion aw chi pen dihkim lou ding ahi.
- ii) ***Kim-le-pam a siltungte***: Kim-le-pam a silpiengte pansan in Pasion deina theithei ahi (Rom 8:28). Setan in Paul Thessolonika a ahawding adal a, a tangin Timothy avahaw a Pasion siltup sepkhiah in aum thouthou hi (1Thess. 2:18, 3:1-2).
- iii) ***Piching zawte tungtawn in zong theithei ahi***: Pasion Hagau Siengthou in pienna nu-le-pa, lamkaite, leh seppi mi muonhuoite tungtawn inzong adeilam hing zilsah thei in hing kawmu thei hi (Thupilte 24: 6, 20: 18, 13: 14, 12: 15-16).

Ahivangin, mi deisah thuhilna bou in akingasieng sih dinga, mi thuhilna lah lou kei ding zong adeituon sih hi. Thumkawm in Pasion idong ding ahi.

- iv) ***Lungtang a Hagau Siengthou puina:*** Laisiengthou in, “*Pasian Hagauin apui poumate, Pasion tate ahi uhi (Rom 8:14)*” chi hi. Tuami umdan ahileh, Pasion tate/ ta pouma Pasion Hagau in apui china ahi. “... *Pasian kunga thum in, ngah kawm lei adeina hing theisah ding hi.*” Nasp. 13: 2, “... *Hagau Siengthou in, Barnaba leh Saul kei a dingin hing koituompieh un*” achi hi.
- v) ***Thumna tungtawn in Pasion in adeina hing hil thei (Jer. 33:3):*** Pasion kungah Ama toh kizopna hoitah nei in, ama dei bangbang zui dingin kiman in i thum ding ahi. Tua hileh Pasion deina lampi imu ding uhi.

Akhupsitna: Leitunga mihing piengkhe zousie dia poimaw pen khu pienthana ahi. A nina ah, Pasion deina muna um, Pasion dei leh guot a nasep khu ahi. Pasion ta ihi nua in Pasion deina mun, sepna pieh itangsia ithei khelvang in isep khop ding pen a um tham hi. Ahivangin, Pasion deina muna i um leh i nasepna lungkimna leh gasuona itang dinga sum a kilei theilou hausatna ahi. Pasion deina sui ding in Ama beel chiet vai.

Dohnate:

- i) Khristiante bangchi dingte ihi uai?
 - ii) Pasion Hagau pui a umte koite ahi uai?
 - iii) Pasion deina thei chetnate bangbang ahiei?
-

SIMMUN-13

BIEHNA (Worship)

Thuchin ding : *“Pasian khu Hagau ahia, abe miten Hagau leh thutah a abieh ding ahi.”* Johan 4:24

Taangtel : Late 95: 6-7, 115: 1-8, 1Khangthute 29: 10-13.

Zillai in atup : Pasian zatatna leh thupina zousie pieh a bieh ding ahidan leh Biehna bang ahiei, bangchi bang a bieh ding chi theisiemsah ding ahi.

THUZIL DING:

BIEHNA ichi thumna leh phatna leh patawina toh kibang lou hi. A.P. Gibbs in, *“Mangpa aw, hing hundam in”* ichi leh thumna ahi-a, *“Mangpa, na hing hundam manin ka kipah hi”* ichi leh phatna leh patawina ahi-a, *“Mangpa, Nangma na hina mama jiehin, ka kipah hi”* ichi chiengin Biehna ahi, chiin ana gen hi. *“Biehna”* kichi thumal Laisiengthou a kimuna masapen Siem. 22:5 a, Abraham in asuo tangvalte kunga, *“... kei leh naupang apam ah va pei va ungin, Pasian va beva ungin”* achi hi. Thuhun Tha a kimuna masapen, Mipilte’n Jesu Khrist hing pieng a biehna uh ahi (Mt. 2:2, 11).

1. Biehna bang ahiei? Biehna kichi thumal Angla Saxon haam, *“Worship”* a khietna *“manphatna”* chi apan kilakhie ahi. Ahin, Pasian bieh ichi chiengin, Pasian zatatna, thupi leh lamdang i sahna, a haan leh silbawltheina, a pilna leh siemnate thei a, Ama kunga zatatna pia a phatna lungtang sung apan kam a genkhietna ahi. Biehna ichi phatna leh patawina sangpen piehna ahi mai hi. Pasian i bieh chiengin Ama ngel ahina leh a hina dihtah banga phuonkhietna ahi. Pasian biehna ah: (i) Lungtang a hing Siempa tunga ngaidan i nei apoimaw hi (ii) Tua lungput inei luonglet kilangkhiie ahi ding hi (iii) Hinna leh Hagau zatatna lienpi toh, lamdangsahna toh, thupisahna kibungkhia a um hi (Late 23: 5, Solomon La 2:3-4, Late 7:11-22).

2. Biehna poimawmate: Biehna poimawna tampi gen ding um nanleh tamlou a poimaw diehte itahlang ding uhi.

- i) Thupieh 10 a amasa thumte in Pasion bieh ding ahina a genchien mama uhi (Exo. 20: 3-7, 34: 14). Pasion bou Pasion a nei a bieh ding china ahi.
- ii) Pasion in gamdai a biehbu leh Gentel ana phukhiet zong biehna mun ding ahi (Exo. 29: 43, Late 18:6).
- iii) Pasion in suongtu masa, Abraham, Mosi, Isai leh David biehna dan ana zilsah hi (Siem. 22: 1ff, Isai. 6:1ff, 1Kumpite 12:20).
- iv) Pasion bieh tangtawn ikhosah ding dan ahi (Kil. 4 & 5).

3. Koi ahiei ibieh ding uh? Luk 4:8, Late 45: 11 ah, “*Mangpa na Pasion na bieh dinga, Ama nna bou nasep ding ahi*” chiin hing hil hi (cf. Mt. 4: 10). Ama bou Pasion leh Mangpa dihtah ahiman in i bieh ding ahi. Tua banga Pasion Ama bou bieh ding ahi laiin bieh dinga a phallou khenkhat um hi. Milim bieh lou ding (Exo. 20: 4), mihing bieh lou ding (Nasp. 10: 25-26), vansawлтаhte bieh lou ding (Kil. 19: 10, 22:8-9), silsiente bieh lou ding (Danp. 4: 10-20, Job 31: 24-28) chi kichien tah ahil ihi uhi. Milim biehna chi tuomtuom a um thei hi. Tuate Eima Pasion a kinei (Dan. 6:6, 28), sum (Epha. 5:5, Kol. 3:5), sum dawnna, noptalna, innkuan, tate, zite, pasalte, zu-le-sa, khamthei silchinte Pasion sangin it zawh pen milim biehna ahi.

- i) **Pa Pasion:** I bieh ding uh ahi (Jn. 4:23). Silbawlte leh nasepte, A itna leh A tapa Jesu Khrist hing pieh leh Hagau lam leh tahsa lam guoljawlna hing piehte zousie zalin Ama ibe ding uh ahi.
- ii) **Tapa Pasion Jesu Khrist:** zong i bieh ding uh ahi (Jn. 9: 38, Kil. 5:6-14, Mt. 28:17). Ama i Mangpa leh Hundampa, tangtawn Pasion, Hagau lam guoljawlna chiteng nah ahiman in i bieh ding uh ahi (Epha. 1:3-23).

iii) **Hagau Siengthou:** bieh ding a sawlna leh biehna Laisiengthou ah akimu sih. Ama panpina a Pa Pasion leh Tapa Pasion bieh ding Pasion deidan ahi.

4. **Bangchi banga Pasion bieh ding?** Pasion bieh dingdan tamlou i enkhawm ding uhi.

- i) Zatatna toh Ama a dingin i bieh ding ahi (Late 33:8), “*Leitung pumpi in Mangpa giing henlen, khovel a tengte zousie ama zau in chiza uhen*” chi ahi.
- ii) Siengthouna toh kithuom in Mangpa bieh ding ahi (1Khangthute 16: 29, Late 29:2, 66: 4, 96: 9). “*Sienthouna toh kithuom*” chi in lungtanga sienthouna leh polam a kilang siengthouna toh kithuo a Mangpa bieh ding china ahi. Kibawltawm Pasion in pomlou china ahi (Mt. 7:6-7).
- iii) Pasion mai a kuun a, khupdin a i bieh ding uh ahi (Late 95:6). “*Kuun leh Khupdin*” in zahtatna, a thupina leh silbawltheina phawna agenna ahi.
- iv) Pasion kengbul a i bieh ding uh ahi (Late 99:5, 132:7). “*Pasion Kengngahna bul (kengbul)*” chi in Ama sanga neu zawtham i hina, aletna thuneina, a tungnungna theikawm a bieh ding china ahi.
- v) Pasion taang siengthou ah i bieh ding uh ahi (Late 99:9). “*Pasion taang siengthou*” kichi Pasion biehna ding mun siengthou sehtuom leh suhsienghou genna ahia; tu hun in a Gentel ah china ahi.
- vi) Hagau leh thutah a bieh ngeingei ding ahi (Jn. 4: 24).

Akhupsitna: Biehna bang ahia chi i theita ua. Pasion bieh ding ahidan i theita uhi. Pasion siengthou leh thupi seng a bedin iching jou sih hi. Ahivangin, Jesu Khrist tatkhetna a sisan in a ching in hing bawl hi. Hamphat huoi hi! tua ahiman in i lungtang sunga sienthouna toh, i Muh leh Kaam (Lip & Tongue), i tahsa hienge

kikem siengthou in Mangpa i innsung ah, i Gentel ah, i nasep leh neh-le-ta suina mun ah, i gamtat leh nasepte Ama pomtah ding a kibawl in i be ding uhi.

Dohnate:

- i) Biehna ichi bang ahiei?
 - ii) Koi ahiei i bieh ding?
 - iii) Pasion taang siengthou tu hun a heimun ahiei?
-

SIMMUN-14

PHATNA LEH PATAWINA

Thuchin ding : “*Mngpa khu athupi a, i Pasion khopi a, amuol siengthou ah thupina a phat ding ahi.*” Late 48:1

Taangtel : Late 148: 1-14, 150:1-6.

Zillai in atup : Mangpa Pasion thupi seng a phattah mama ahiman in theitawp a phat ding ahidan theisiem sah a, Pasion pomtah ching phatna pieh ding dan zong theisiem sah ding ahi.

THUZIL DING:

“*Phat*” ahilou leh “*pahtawi*” ichi chiengin bang ahiei khat a hoina leh achi tahna zousie genkhia, phuongkhia, sakhia, lungdampi, kipahpi a lam, tawisang, geldoh a panpina a genna ahi. A kimtah a kigen chiengin kipahna thugen leh kipahna tah latna a gen hi. Pasion kunga phatna leh patawina i pieh chiengin a phatap ah biehn tung teitei hi. Hebrue haam in, “*Phat*” chi thumal chi thum kizangte apan, phat kichi, thawmging kichientah, lopna, kikouna, tunging toh thuo, khutjah kawm, khupdin chite kigawm ahi.

1. **Bangzieh a Pasion phat ding e?** Pasion phatna ding jie tam-seng, genjaw guollou ding ahi. Ahivangin, beilam tah a muh thei Pasion thu apan isutkhawm ding uhi.

- a) **Pasion Ama a phattaah pen leh a chingpen ahi man in (Late 18:3):** Pasion athupi a, alien a, ahat a, a pil a, hoiseng ahiman in phat ding ahi (Late 48: 1, 86: 10-12, 96: 4). Pasion, Ama mai Mangpa ahia, Ama bou Pasion ahi-a, Ama a thuneipen, a sangpen, mangte Mangpa, kumpite Kumpipa ahiman in leh tangtawna umden, bangkim siempa, bangkim tunga a lienpen ahiman in phat ngeingei ding ahi (Isai 24: 14, Late 138: 5, 145: 3, 148: 13).

- b) **Phatna in Pasion athupi sah hi:** Phatna leh patawina laa ten Pasion a thupisah uh ahi (Late 50: 23). Pasion pen eite phat leh phat lou in Ama neusah in lien tuom sah lou in, Ama a lien gige sa ahi. Ama iphat chiengin a thupina a theiloute theisah ichina ahi.
- c) **Mangpa phat ding a thupia ihi:** “*Mangpa phat un*” chi thumal Hebru haam in “*Hallelujah*” ahi (Late 146:1, 147: 1, 148: 1, 149:1, 150:1,6). Tam thumal thupiah genna a kizang ahi. Tua ahiman in Mangpa iphat teitei ding uh ahi.
- d) **Mangpa a sienthouna a thupi man in iphat ding ahi:** Sam gelpa’n “*Aw ka hinna, Mangpa phat inlen, phattuomna ahing bawlpieh zousie manghil vawt sin*” (Late 103:2) ana chi hi. Pasion hoina, silhoi bawl a hausa ahiman in ahoina vangin iphat ding ahi (Late 107:21).
- e) **Mangpa’n hundamna hingbawlsah man in iphat ding ahi:** Laisiengthou in, “*Israel Mangpa, Pasion pahtawi in um heh. Aziehpén Amana mite ahing ve a, ahing tanta hi. Tualeh asuoh David innkuonte lah ah hundamna kii ahing tungdoh ta hi*” (Lk.1:68-69) chi imu hi.
- f) **Mangpa pilna athupi seng man in phat ding ahi:** pilna leh hanta Mangpa a ahia, mi pilte kunga pilna apia a, theisiemna theite kunga theina a pieh man a tangtawn tangtawn a phat ding ahi (Dan. 2:20-21). Sawlta Paul min, “*Pasion pilna leh theina tualeh a hausatna thuh hina va-ia e, A thukhennate suikhiet guollou leh! Alampite zong mukhiet guollou hina va-ia e*” ana chi hi (Rom 11:33).
- g) **Pasion silbawltheina thupi ahi man a phat ding ahi:** Pasion silbawltheina-silsiemna, tatkhietna, thukhenna, guoljawlna, ngaidamna, kepbitna leh adang dang ahi. (Late 150:2 ah, “*Asilbawl thupitahte zieh in Ama phat un*” chi imu hi.

2. **Pasian koiten aphant ding e?** Pasian phat lou ding umlou hi.
 - a) *Vansawltahte'n* Mangpa a phat ding uh ahi (Late 103: 20, 148: 2).
 - b) *Misiengthou*, Pasian tate zousie in Mangpa a phat ding uh ahi (Late 30:4, 135: 19-20).
 - c) *Nam zousie in* Mangpa a phat ding ahi (Late 117: 1).
 - d) *Silsiemte'n* Mangpa a phat ding ahi (Late 148: 3-10).
 - e) *Mihing zousie'n* Mangpa a phat ding ahi (Late 148:11-14).
 - f) *Pasian suohte'n* Mangpa a phat ding ahi (Late 113:1, 134:1, 135:1).

3. **Bang hun a Mangpa phat ding e?** Pasian phatna phattuum nate tamlou i en ding uhi.
 - 1) ***Mangpa- Pasian phat a lasah-hoi, nuom in kilawm hi:*** Late 147: 1, “*Mangpa phat un, i Pasian phata lasah ahoi mama a, tuakhu anuom a, tualeh Ama phat akilawm mawng ahi*” chin hing hil hi (KJV). Thusia, lasia gen a umte sangin Mangpa phat a la sakhawm imu chiengin hoi a, nuom a zong kilawm mama hi (Late 135: 3, 33:1).
 - 2) ***Mangpa phatna in thaguon in thahatsah hi:*** Mangpa phat leh pahtawi kawm a kalsuonte in thahatna akipan hatkia semna ah kalsuon uhi (Late 84:4-7).
 - 3) ***Mangpa phatna leh pahtawina in thupi hi:*** Kumpipa Jehoshaphet in gam 3 kigawmte in a dou sawl laiin chimawh in Mangpa donga Mangpa lemsahna bangin lasa pawlte lamkai in koi a galte zousie buoigawp in galzawhna thupitah tang hi. Phatna in thupi sah hi (2Khangthute 20: 21-22).
 - 4) ***Mangpa phatna lasa in dawite notmang in jausah hi (1 Sam. 16: 23):*** Kumpipa Saul subuoi Pasian sawl dawite hawlke dingin David in tunging toh lasa in a hawlkhia hi.

4. **Bangchi banga Mangpa phat ding adiei?** Mangpa phat chienga um ding dan tuomtuom Laisiengthou ah kimu hi. Ahivang in a poimaw pen iumdan hilou in lungtang hi (1Sam. 16:7).
- 1) ***Dingkawm in:*** Ding chi in zahtatna a gen hi. Mi izahtatte mai ah koima tou ngailou in, ki ding den hi. (Late 134: 1, 135:1).
 - 2) ***Khut tungtou in:*** Ki piehkhietna chiemte na khat ahileh khut tung ahi. Galkapte melmate mai a akipieh chiengun (surrender) a khut uh tung/ dawmsang uhi (Late 134: 2, 28:2, 143: 6).
 - 3) ***Khut bengkhawm in:*** Kipahna, lungkim leh nopsahna chiemtena chi khat khu khutbet ahi (Late 47:1). Kipahpina leh pompina zong khutbet in khat veivei kilang thei hi.
 - 4) ***Kunshu ahilou leh khupdin:*** Zahtatna leh thupina piehna mite masang a kun ahilou leh khupdin in ki um hi. Pasion masanga zong bawldia kilawm ahi (Late 95:6). Ni khat ni chiengin mi zousie Jesu Khrist masanga a khupdin ding hi (Phil. 2:10).
 - 5) ***Laam kawmin:*** Kipah seng man in mi khenkhatte laam thei uhi. Laamna toh Mangpa phat zong Thuhun Lui leh Thuhun Tha ah kimu hi (Exo. 15:20, Vaih. 11:34, 2Sam. 6:14- 16, Jer. 31:13, Nasp. 3:8, Lk. 6:23). Ahivangin, lu-le-taw phawhlou, siel-le-pha theina mangzen a laam pen kithuzawlou man ahi, pil van ding ahi.
 - 6) ***Tumging tuomtuom toh thuoh in:*** Late 150: 3-5, 1 Khangthute 23:5, Kil. 14:2-3. Tumging pen phatna lasa zentu leh kilawm sah ahi ding ahi. A ging ngaiseng, leitung toh kilawmte lah a pilvan ding ahoi hi. Tahsa utnate zong, izatkhel leh piengsah thei hi.
 - 7) ***Maitai leh Nui kawmin:*** Israelte'n saltang akileh lai un thei uhi (Late 126: 2, Job 8:21). Kipahna lasa nuimel toh kilawm. Dahna mun a lasa nui velvul akilawm lou!

Akhupsitna: Mangpa phatna leh patawina thu izilte chiemte ngei ngei ding ahi. Lungtang a ilungput sanga poimaw zaw umlou hi. Mi zousie kipah leh zong laam, khutbeng in umkhawllou thei hi. Mihingte pienzia tuomtuom nei ihiman un iki theisiem ding uh ahi. I umdan khat pou pou a ki-letsana, midangte simmawna a bawl leh biehma leh phatna chinglou ding hi. Midangte pua na dinga bawllou teitei ding ahi. Mangpa'n theisiemna hingpia ta hen.

Dohnate:

- 1) Ama phat ichi bang china ahiei?
 - 2) Mangpa phatna ah apoimaw pen bang ahiei?
 - 3) Ni khat ni chiengin mi zousie bangchi ding ihi uai?
-

SIMMUN-15

KHRISTIAN THAWLAWM PIEHNA

Thuchin ding : *“Pia un, tuachi’n pieh in na um ding uh, hoitaha tein, namdet inlen, loh thopin, tuachi’n adimlet in na angsung uah pieh in na um ding uhi. Aziehpén na tenna mama un ahing kitehpieh ding hi.”* Lk. 6:38

Taangtel : Lavt. 27; 30-33, Danp. 14:22, 28-29, Malaki 3:7-12, 2Kor. 9: 6-15

Zillai in atup : Khristian thawlawm pieh ding dan dihtah thei dinga zilsah ding ahi.

THUZIL DING:

Khristian biehna ichi itna vanga kipumpiehna a kibulphuh ahi. *“Pasian in khovel a it seng senga, tuachin a tapa tangkhat neisun apie hi”* chi Christain thugin laigil ahi (Jn. 3: 16). Pasian hattuom a itel nasan ding dihtah pen hattuom in kei a dingin bang hamphatna hingpe diei, chi hilou in hattuom tungtawn in ken bang ahiei ka bawlthei leh ka pieh thei chi hizaw hi. Sawltahlian Paul in, khristian silpieh suhatna ding agen poimaw mama pen, *“Silpieh gensengloute zienin Pasian kungah kipahtu um hen”* chin ana gen hi (2Kor. 9: 15). Pasian a ding a thawlawm ituoh chieng a ikiteh nading pen midangte’n bangjah apie uai? Chi hilou in Pasian hingpieh bang ahiei chi ahizaw ding ahi.

1. **Khristian-Silpieh/Thawlawm ki bulphu na:**

- 1) Pasian silbangkim siempa ahi, silbangkim ama a ahi (Siem. 1:1-13, Late 24: 1-2). Lei leh van en in khawda lei imuthei zousie leh imuthei loute zousie zong Pasian siem ahima in abawn pia Ama ah ahi (Kol. 1:16). Tua ahimanin kei a, nang a, ama a, ei a ichi ding umlou hi.

- 2) Mihing pumpi Pasion bawl ahi ban ah Khrist tatkhetna man a peisah/ leisa ihi uh ahi (Siem. 1:26-28, 2:1-7, 18-25, 1Kor. 3: 16-17, 6: 19-20). Pasion siemsa ihi manin Pasion a ihia, mana leisa ihina uh theichien ding ahi. I pumpi siempa leh neipan ei a um tengteng a nei sieng hi.
- 3) Sana leh dangka a unsieng a Pasion a ahi (Hag. 2:8). Sum leh pai mu theina hing pepa zong Ama ahi (Dan. 8:18). Leitung a hausatna a kiphum zousie Pasion koi ahi. Tua jong mihingtea hing khuolna ahi.
- 4) Ganhing zousie Mangpa a ahi (Late 50: 1-12). Ganhing namchin Pasion bawl, ama kep ahi manin Ama a ahi. Eite Pasion neisa kem leltah ihi uhi chi kitheichet mama ding ahi.

2. **Khristian- Silpieh/ thawlawm kipatna sawm-a-khat ahi:**

1) **Thuhun Lui a Sawm-a-khat piehna leh kipatdan:**

- a) Thuhun Lui a sawm-a-khat pe masapen Abraham ahi (Siem. 14: 18-20). Aman sawm-a-khat apieh laiin Israel a pieng naisih hi. Aman Gentel mi ahi. Thamlou in, dan thupieh a um naisia, dan thupieh pen Mosi a pieng naisih hi. Pasion deidan a lungsunga kilah bangin a pieh hi.
- b) Jakob in Bethel mun a Pasion a kibuoipi lai in Pasion guoljawlna atan teng jousia sawm-a-khat pieh ding in thuchiem abawl hi (Siem. 28: 21-22). Ama Pasion ahi a ki thei a, bangkim Pasion apan ahi chi a thei manin sawm-a-khat pieh ding thuchiem abawl ahi. Bethel, Jakob pienthana ahi hi.
- c) Pasion deidan a misiengthoute lungtanga kilang dan thupieh in anamkip hi. Haichi namkim leh singgate, leh ganvulte a sawm-a-khat pieh ding ahidan imu hi (Levt. 27: 30-33). Tua bangzel in bangkima sawm-a-khat pedinga sawl in ium uhi (Nam. 18: 25-26, Dan. 14: 22, 28-29, 12: 15-17, 26: 12-14, 2 Khangthute 31: 6, Neh.

10: 38, Malaki 3:7-12). Pasion mite'n sawm-a-khat dihtah in kipe leh thawllawm dang ngailou/ kullou phiel a kiching dingdan ahi. Pasion mite zousie in pieh ding ahi.

3. Thuhun Tha a Sawm-A-Khat piehna:

- a) Thuhun Lui a zilsahna kichientah um Thuhun Tha a abei-sahna umloute setden ahi. Aziehpén Laisiengthou laibu khat ahi hi. Sabbath bang kigen bei a sawm-a-khat kigen beilou hi (Mk. 2:27-28, Lk. 6:5).
- b) Jesu Khrist in Pharisaite sawm-a-khat apie dan a dan thupieh poimaw mamate- dihtatna, hepinate, gin-umnate ngaisah dingin athuhil hi.
- c) Dan Thupieh sanga hepina a sanzaw mah bangin hepina hun a silpieh sawm-a-khat ban ah a tamtheipen a pieh ding imawpuo ahi (Lk. 6:38, 19: 8, Nasp. 2:44-45, 1Kor. 16: 1-2, 2Kor. 8:1-5, 9: 6-15). Hepina Hun a gingtute'n sawm-a-khat banah Pasion guoljawlna imu bangbang toh kituo tah leh adih theipen pekhawm dingte ihi uhi.

Akhupsitna: Thuhun Lui hun laiin dan thupieh in sawm-a-khat pieh ding phut ahi hi. Hepina hun a phut ahilou vangin pidinga sehsa/ guotsa ahi. Michiin thawllawm ei ngap dandan pieh ding hilou in Pasion in michin ngapza dinga a tawm theipen a she sawm-a-khat pieh ding ahi. Sawm-a-khat peloute "*suomhat*" ahi, Laisiengthou in achi hi (Malaki 3:7-12). Sawm-a-khat piehlou hamsiet ahia, ahivangin piehpen guoiljawlna ahi (Mal. 3:10-12). Sawm-a-khat pen tami mawnga chi umlou in imu zousie apan pieh ding himai hi. Ha sum, bu-le-baal, ganvul ganta man, gamlah a ganta imatte man, theiga chi tuomtuomte man, puongatte man, puonkhuite man khutsiem silbawlna man leh adang dang zousie apan sawm-a-khat pieh ding ahi.

Dohnte:

1. Khristian biehma kibulphuhna bang ahiei?
 2. Thawlawm tuoh/pieh chienga ikitehna ding bang ahiei?
 3. Pasion mi zousie pieh ding bang ahiei?
-

SIMMUN-16

THUMNA (Prayer)

Thuchin ding : *“Tuaziehin amasapenin dei ngetnate, thungetnate, thungetpiehnate leh kipahtugen nate mi zousie a dinga bawl pieh dingin ka hing hanthawn hi.”*
1Timothy 2:1

Taangtel : 1Tim. 2:1-6, Jn. 17:1-26, Mt. 6:5-15.

Zillai in atup : Pasion bangkim a kiching ahina thei a thumna uangbawl ding leh thumna silbawltheina dan thei a thum ding ahidan zilsah ding ahi.

THUZIL DING:

Pasion adinga silthupi bawl na nuom ei? Thum gige din kipe lelin. Mangpa'n *“hing han inlen, ka hing dawng dinga, tualeh na theingeilou sil thupi leh sil kiphuol ka hing musah ding hi”* achi hi (Jer. 33:3). Na gingta ei? Thum masa phawt in. hivangin, ginna atoh thum ding ahi. Midihtat thumna in silbawlthei in vanglian ahi chi thei in thum in.

1. Thumna bang ahiei? Pasion mizat mithupite'n thumna hilchet-na leh genchietna tuomtuom tampi anei hi. Ahivangin, a tompen leh a kimpen dinga ingaisut igen ding hi. Lungsim a vom hahsa lou ding ahi. Tuapen, *“Thumna kichi Pasion bangkim bawlthei leh bangkim a kiching A it mama a ta toh kithuo a houlimna”* china ahi. Pasion kunga dei leh ngaiteng kuma thu vatun hilou in Pasion toh houlima kithuo china ahi. Pasion kunga i thum chiengin Ama toh kihou tahpi, eite'n zong thugen, Aman zong hing houpi ahi chi theichet mama ding ahi.

2. Thumna a jetel ngeingei dingte: Mi tampite'n a theidan un thumna kichi Pasion kunga dei leh ngai/ tahsap zousie vangen

china in athei uhi. Ahivangin, Laisiengthou hoitah a isim leh thumna pen ngetna bou hilou ahi chi kichientah in akimu thei hi. Thumna a kihel dingte:-

- a) ***Biehna leh phatna:*** Pasion thupina, thuneina, silbawltheina, phat a pahtawina leh biehnah thumna a poimaw a tel ngeingei ding ahi (Late 95: 6, 100: 1-5). Hagau lam a pichingte thumna ah phatna leh pahtawina a tam hi.
 - b) ***Thuphatawina:*** Pasion melvah a ikiehnah ichizawhlounate leh khelnate phuongkhia, ngaidam ngetna ahi. Pasion toh kinai pouma in chinlou kisahna tampi imu uhi (Isai. 6:1-8, Late 51: 1-19). Hagau lam hat kisah, midangte misitte Pasion toh kigamlate ahi nuomzaw uhi.
 - c) ***Kipahthugenna:*** Siltuoh anuom leh hamsah, kipahna leh dahna hun a zong, bangchilai pou a Pasion hoina leh itna thei a kipahtheina neite Hagau mite ahi uhi (1Thess. 5: 16-18, Hab. 3: 17-19). Hagau lam pichingte siltan ahi.
 - d) ***Ngetna:*** Ngetna ichi chiengin, ei tahsap leh poimaw, midangte tahsap leh poimaw ngetpina ahi (1Tim. 2:1). Eima tahsap leh poimawte nget ahoi a tua sangin kidangte a dinga thumsah apoimaw sem ahi.
- 3. Thum dingdan:** Laisiengthou zilsahdan theichet poimaw mama hi. Tup-le-ngim kichientah neia Pasion toh kihouna thumna ahi chi igen jouta hi. Pasion khat a Mithum kigawm ahiman in thumna ah bangchi bang kizopna anei kha uai?
- a) ***Pa Pasion kunga nget ding ahi:*** Mangpa Jesu Khrist in na thum chiengua, “*Ka Pa uh van a um, Namin kizatat hen*” na chi ding uh ahi (Mt. 6:9). Jesu min a Pa kunga inget pouma pieh a um ding chi thuchiem inei uhi (Jn. 15: 16c, 16: 23-24). Pasion, Pa chia ihat thei ihamphatna ahi.
 - b) ***Jesu min tungtawna nget ding ahi:*** Pa Pasion leh a tate kikal ah khatbou aum Jesu Khrist ahi (Jn. 14: 6, Nasp. 4:

12, 1Tim. 2:5-6). Pasion kunga ithumna zousie Jesu min tungtawna nget ding ahi (Jn. 14: 13-14, 15:16, 16:23-24). Ama vantunga gensahpa ahi (Heb. 9:24).

- c) **Hagau sienghou panpina thum ding ahi:** Hagau Siengthou in eite hing thumpia gige hi. (Rom 8: 26). Hagau Siengthou nget ding ahi (Juda 20). Paul in, “*Thungetna leh ngetna chintengin bangchi lai pouin Hagau a thu ngen nginget un...*”chin hing hanthawn hi (Epha. 6:18).

4. Hoi mun a thum ding? Laisiengthou i et chiengin bangchi laipou a, hoimun pou a thum ding ahi chi imu thei uhi. Koipou in eima neh suina mun, nasep namun a thum thei ahi chi thei a lemtan ilah ding ahi (1Tim. 2:8). Pasion toh ikinai theina mun penpen a mun leh muol hoipen ahimai hi. Innsung tawng ah zong thum thei ahi (Mt. 6:6, Dan. 6:10), muol tung ah (Mt. 14:23), suongkul sung ah (Nasp. 16:25), cross tung ah (23:42), tembaw sung ah (Nasp.27: 35), inn tung ah (Nasp. 10: 9), ngapi gil sung ah (Jonah 2:1), huan sung ah (Mt. 26: 39, 42), Gentel sung ah (Lk. 18: 10) leh mun dangah zong thum gige thei ahi.

5. Bang hun a thum ding e? Thumna dinga hun guottuom/ setuom a um sih. Ei guot hun a hoipen ahi. Thum gige ding, tawplou a thum zing ding ahi (Lk. 18: 1, 1Thess. 6:17). Zingkal (Mk. 1:35), nitah, leh suun (Late 55: 17), zaankim lai (Nasp.16: 25), nitenga thum vei thum thei ahi (Dan. 6:10).

6. Bangzieh a thum ding e?

- a) Pasion in thum dia ahing hanthawn ahiman in (Epha. 6: 18, 1Thess. 5: 17, 25).
- b) Jesu Khrist thum etton ding ahi (Heb. 5:7, 1Pet. 2:21).
- c) Hagau Singthou etton ding ahi (Rom 8: 26).
- d) Hattuom mi masate etton ding ahi (Nasp. 1:14, 2:42, 6:4, 12:5).

- e) Dawi mangpa jawh nading (Lk. 23:34), hundamloute hundam nading (Lk. 18:14) nua tolte kinuoleh kia nading (Jak. 5: 19-20), mi singthoute thahat nading (Juda 23, Mt. 26: 41), nnasemite Mangpan ahingpie nading (Mt. 9: 38), Damloute dam nading (Jak. 5: 13-15), Pasion minthang nading (KIL.5:8), sil thupi bawlthei nading (Mk. 9:20), silhoi itan nading (Mt. 7:7), pilna I nei nading in (Jak. 1:5), lungmuonna inei nadiig (Phil. 4:5-7), khelna pan ibit nading (Mt. 29:41), Pasion deilam thei nading (Lk. 11:9-10) in ithum ding uh ahi.
7. **Thum chienga um ding dan:** Thum chienga umdan sangin lungtang a ngaisutna poimaw zaw ahi. Laisiengthou in mutheite: Dinga thum (Mk. 11:25), toukawm in (1Khangthute 17:16-27), kuun kawm in (Exo. 34:8), lum kawm in (Late 6:6, Isai. 38:11ff) bokhup kawm in (Late 28:2, Ezk. 9:8), khupdin in (Dan. 6: 10, Lk. 22:42), mai a leisu kawm in (Mt. 26: 39), khup kikal a mai phumlut in (1Leengte 18:42) ahi. Pasion izahtah theina leh nai theina pen a hoipen ahi.
8. **Thumna dal theite:** Thumna dal theite lah a khenkhatte: Gingtat joulouna (Jak. 1:6-7), ngaidam thilouna (Mk. 11:25), khelna lungsim puona (Late 66:18), angung khuolna (Jak. 4:3), nupa kal kilemlouna (1Tim. 2:8, 1Pet. 3:7), kisahtheina (Jak. 4:4, 1Pet. 5:5), leitung mitna/tahsa mina (Jak. 4:8, Rom 8:8) bang ahi.

Akhupsitna: Jesu Khrist tatkhietna tungtawna eima ki siampu theina, Pasion mai a thum theina inei i hamphatna ahi (1Pet. 2:4-5, 9-10). Thumna ichi Pasion nasep theina lienpen ahi. Leitung pumpi ading, mi zousie a ding in kit hum thei hi. Pasion in thumna dawnlou neilou hi. Ama thumnate dawng manlou ding khopin manlang gige lou hi. Adawna khenkhatte: Awle chin pepai a, i-ih chin phalnailou

pawl nei in, ngah tadih in achi um hilzaw hi. Thum ngailoute Hagau mi kichi ngailou hi. Na tasap zousie ngen a thum thei nahi chi thei inlen, thumna uangbawl in, thum mi suoh sawm in.

Dohnte:

1. Thumna ichi bang ahiei?
 2. Thumna a pang dingte bangbang ahiei?
 3. Thumna dawnna chi thumte bangbang ahiei?
-

SIMMUN-17

KHRISTIAN GUOLJAWHNA HINKHUO

Thuchin ding : *“Pasian a pieng pouma in leitung pumpi azouta hi; tualeh tami ahi leitung pumpi izawna uh; iginna uh.”* 1Johan. 5:4

Taangtel : Johan 15:1-7, Rom 8:31-39, 6:1-14, 1Johan 4:1-16

Zillai in atup : Khristian hinkhuo a Pasian siltup hundamna gou hilou in, guoljou hinkhuo a hinga Khrist batna a khan ding ahi chi theish ding ahi.

THUZIL DING:

Pasian in Khristian hinkhuo a siltup Khrist bat ding ahi (Rom 8:28-30). Hagau Siengthou in gingu hinna a sep a tuo zong tua ma ahi (1Kor. 3:17-18). Sawltalian Paul in khristinate adia a deisah zong Khrist bat ding ahi (Gal. 4:19). Tulai hun in piengthalou koima ut nonlou, khristian hat leh guoljou hibou koima ngap lou, piengtha ihi leh i niteng hinkhuo siemthana hinkhuo toh akilawm nai chia et-tha ding ahi (2Kor. 5:17). Guoljou hinkhuo pen mi khenkhatin khatvei theisiem in neijou peiin akingai ua, midangte simmaw in, ki-uang-sah pawl um uhi. Guoljou hinkhuo pen theisiem a neiden thei ahi sia, niteng hinkhuo ah a tahtah a siltuo ahi. Zingkal thumna leh ki pumpia navanga guoljou hinkhuo nei a, ann nehjou a lungthana leh thangpaina phuhkha a guollet dimdiem a um thei ahi. Sawlta Paul in, *“Jesu Khrist i Mangpa a ka hing nei unaute aw, noute kisahtheipiin nitengin ka shi hi”* (1Kor. 15:31) chin ana gen hi. Eite adingin seken tengin (every second) ka si poimaw ding himai thei ahi.

1. Guoljou hinkhuo silbawlthei ahi: Pasian thu in khelna nuoisia a guoljou hinkhuo neithe ahi dan ana gen hi. *“Pasian a pieng pouma in leitung pumpi azouta hi; tualeh tami ahi leitung pumpi izawna uh; i ginna uh.”* (1Johan. 5:4) chi imu hi. Tuapen, piengtha zousie Pasian apan pieng ahiman un khovel tunga

guoljaw theina nei ahi pei uh china ahi. Guoljawhna dingin Jesu Khrist iginna a kingah ahi chi imu hi. Johan in vantunga guoljawhna ding thu gen hilou in, leitunga, niteng hinkhuo a guoljawhna gen ahi. Guoljawna ding thuchiem Laisiengthou ah tampi a um hi (Jn. 7: 37-39, 10: 10, Rom 6:14, 8:37, 2Kor. 10:13, Gal. 5: 16, 1Jn. 5:4 sim ding ahi).

2. **Guoljawh theina dan ginna ahi:** Khristian guoljawh theina dan Pasion apan silthawnpieh ginna a tang thei ahi. *Khatna ah*, hepina vanga ginna hundam ihia, hundamna Pasion silthawnpieh ahi (Epha. 2:8-9). Pasion apan iphulou deisahna a itan ahi. *Nina ah*, guoljawlna zong silthawnpieh itan ahi (Gal. 3:11, Rom 1:17, Heb. 10: 38). Eima thahatna leh paubawlthu a itan ahi sih hi (1Kor. 15:57). Guoljawlna pen isung a teeng hundampa nasep ahia, ei panna um hilhial lou ahiman in eite pauhat thu hilou in muonna/ ginna ahizaw hi.

3. **Guoljawlna lampi Khrist toh kigawmna ahi:** Khristian guoljawlna thuguh Khrist toh kigawmna a kingah ahi. Rom 6:4-22 isim chiengin khristian hinkhuo guoljawlna thuguh kimtah in kigen hi. Khrist kross ah thu ni poimaw mama imu thei hi: Khrist sih-le-tanga dinna genna ahi “*En inla, hing in*” ichi a, piengthate kungah, “*En inlen, shi in*” ichi uhi. Khristian shina a kigawmna pen Hagau lam guoljawlna phungpi ahi.
 - a) ***Khrist shina toh kigawmna:*** Pienken mihing lui leh a duhgawh nate Khrist toh shikhawm china ahi. Mihing lui leh a duhgawhna hing kidawh chiengin Khrist toh kross a shina a ka shipi sate ahi chi tahtah na ahi (Rom 6:5-6). Tahsa pumpi tatna ingah masang tua mihing lui duhgawhnate umden ding hi. Ahivangin, nasem thei nonloua bawl ding ahi (Gal. 2:20).
 - b) ***Khrist vuina toh kigawmna:*** Khrist toh ashina akigawm bou hilou in a vuina ah zong ikigawm uhi. “*a shina ah baptis*

in ama toh a vuiin ium uhi” chi ahi (Rom 6:4). Sil shisate vuimang ding ahia, vui mang tawmtawm ding ahi. Lungtang apan hing suoh leh koimang tawmtawm ding ahi.

- c) ***Khrist thawkianna toh kigawmna:*** Khrist thawkiana toh kigawmna leh kizopna pen hinkho tha hinna genna ahi. Khrist shina a shikhawm, a vuina a vuikhawm bou hilou in a *“a shina kibatpi a ama toh ina kizoptah u’leh, athawkiana kibatpi ding uhi”* (Rom 6:5). Mihing lui a khelna leh mawna zousie vuimanga hinna tha khelna leh mohnate nusia a thoukia hinkhuo china ahi. Atah tah a ei ading a ilah ngam, izuingam ding ahi (Rom 6:6, 8, 10).

4. **Guoljawlna lampi atahtah a totna:** Khristian guoljawlna hinkhuo lampi atah tah a tot nading in Rom 6:11-13 tan athupi poimaw theichet akul mama hi.

- a) ***Khelna lamthu a shisa a kikoina:*** Gingtu koipou in khelna setan sawlna leh ze-etnate apan iguoljawlna dingin, *“khelna lam thu a ashisa in kingai unlen”* kichi theichet ding ahi (Rom 6:11). *“Kikoi”* kichi a hiloupi ahi banga pom china ahi sih hi. Pasal khat numei a kisep mawh chidan ahi sih. Khrist in khelna shisan a aumna ah kei toh kizawmta kahi man inkhelna zousie hithei nonlou dinga shi santa kahi chi ngamna ahi. Mihing lui leh a duhgawhnate shisanta, semthei nonlou china ahi.
- b) ***Jesu Khrist a hinga kikoina:*** Khelna nasem dinga shita akikoi phota-Pasian deidan nasem dinga tuom hing (thahat, nasem thei) a um ding china ahi (Rom 6:11b). Silhoi bawl dinga Jesu Khrist a siema uma, tualeh Pasian in akhawsah dan ding mawnga akikoi ahi chi theina ahi (Epha. 2:10, Tita 3:8).
- c) ***Tahsa tunga khelna thuneisah lou ding:*** Mihing lui tahsa sungah tahsa tatkhelna tang nailou ihiman in duhgawhna tuomtuom tampi hingpieng na lailai ding hi (Mk. 7:21-23,

Gal. 5:19-21). Piengtha zou ihmian in khelna vaihawmsah a kizatlou ding ahi. Vaihawm ut gige dinga, en phallou ding china ahi.

- d) ***Tahsa hiengte dihlouna vanzat dinga khelna pieh lou ding ahi:*** Tahsa hiengte pientha masanga khelna vanzatte ahi uhi (Rom 6:20). Tuate mazangin khelna in i tahsa tunga thunei sawm na lailai ding hi. Ahivangin, ka tahsa leh aka hiengte zousie khelna zatsah thei ahinon sih chi thei ding ahi china ahi (Rom 6: 13).
- e) ***Tahsa leh a hiengte dihna vanzat dinga pieh ding ahi:*** Thawkiana hinkhuo a dingta ihi man in Pasian vanzat dinga kipieh ding ahi (Rom 16:13b). Khelna ading in ikiphah sih leh thuneina nei nonlou ahi. Khelna leh Setan idou dinga, idou kawmkawm in Ama sanga hatzawpa kugna ikipelut ding ahi (Rom 6:14).

Akhupsitna: Guoljou ichi bang adiei chi theita, guoljawl nadia lampi leh thuguhte dongin iki zilsah tahi. Ahivangin, Laisiengthou in “*Kikoi*” nading “*Vaihawmsah lou ding*” leh “*Kipieh lou nading*” hing hilchien mama hi. Tuin khristian guoljou hinkhuo ahin ding leh hinlou ding nangma deiteelna ah kingah hi. Heipen nateelzaw diei? Guoljawhna thawnpieh kasan nuom sih leh guollet in ka um ding hi chi ithei ding ahi. Khristian guoljou hinkhuo a hingte ama ading, innkuon ading, khotang ading, nam leh gam ading, Pasian adingin mi manpha leh phatuom ahi dinga, ama ading inzong ahoi dinga, damsawtna leh nopna amu ding hi. Guollet ten vang hamsatna leh mangbatnate a damsung gou ding ahi. Ne deitelna a telkhiel sawm vawtsin aw!

Dohnte:

- 1) Khristian hinkhuo a siltup bang ahiei?
 - 2) Khelna lam a shisa bang china ahiei?
 - 3) Bangin guoljou hinkhuo neitheh ahidan agen ei?
 - 4) Khristian guoljou hinkhuo a sil-hithei tahtah ma hiding ahiei?
 - 5) Khristian guoljou hinkhuo bangchi chienga zatding ahiei?
-

SIMMUN-18

HAGAU MANGTHAI SUINA

Thuchin ding : *“Khantanhoi gen nanleng kisahtheipi ding bangma ka nei sih hi; genlou theilou ka tunga kinga ahi ziehin, khantanhoi gen sih leng ka tung gih ding ahi.”* 1Kor. 9:16

Taangtel : Ezk. 3:16-21, Rom 1:14-17, 2Kor. 5:11-15 Jude 22-23.

Zillai in atup : Jesu Khrist ading a gingtu zousie theipitu hichiet dinga, iumna mun chiet a mite Khrist kunga pui itup gige ding ahi chi theisah ding ahi.

THUZIL DING:

Hattuum masate Hagau mangthai sua hundamna chielpi bawl mei (fire) banga a kuonna uh ahi. Mangthaite kunga Jesu Khrist kawhmuha hundamna amusah leitung nnasep zousie lah a thupipen Pasion lungkimna pen ahi. Jesu Khrist leitunga ahing pei nasan zong, *“Mangthaite sui a hundam ding”* ahi (Lk. 19:10). Gingtu masate’n hundamna chielpi ahun lemtang zousie ua mun tenga zang ahimai uhi (Nasp. 5: 42). Amau khanghun a mite kunga khantanhoi gen a thazaw mama man un leitung pumpi phiel in khantanhoi naza uhi. Eite zong tuabang dinga hat ihi uhi.

1. **Bangzieh a Hagau mangthaite sui ding e?:** Hagau mangthaite sui a ki phamawna tampi gen thei um ding hi. Tuate lah a poimaw khawh diate chiemte chiet sawm lei ichi uhi.

a) Khrist hing peina san ahi leh mangthaite sui ding leh hundam ding ahi (Lk. 19:10). Mangpa’n tuni’n nang leh kei tung ah mawhpuohna ahing pie hi (Mt. 28: 19-20, Thupilte 24: 11-12).

b) Hagau aman tamseng ahiman in gawtmun lutpi di’n pamai

- seng hi (Mk. 8: 36-37). Pasion in leitung pumpi sanga mantam asa zaw hi.
- c) Gawtmun meidil huaise seng ahiman in koiman athuo ding phahuoi vawtlou ahi (Lk. 16: 19-23, Kil. 20:11-15, Mk. 9:43-48). Mihausapa umna gawtmun masa ahia, tangtawn gawtmun a pailut ding ahi nalai hi (Kil. 20: 11-15).
 - d) Khrist tatkhetna man mi zousie ading a pieh ahiman in Khrist in athawn a thuo dingin pamai seng hi (1Pet. 2: 24, Jn. 10: 11, 1Pet. 3:18). La phuopa gen bangin, “*Hing tanpa sisan mawh luonlou ding ahi*” chi thei vai.
 - e) Mihingte shipai ding ihiman in, ihin sunga hundamna tan poimaw mama hi (Heb. 9:27, Jak. 4:13-14). Shi jou chiengin hundamna lampi um lou hi.
 - f) Jesu Khrist hingpeikia pai ding ahi (Mt. 24: 36-37). Leitung pen kiman zouta a, Mangpa thuozauna mai in hing ngah hi (2Pet. 3:9).
 - g) Mangpa thupieh lienpen ahiziehin iseplou theilou uh ahi (Ezk. 3:16-21, 1Kor. 9:16-17).
2. **Hagau mangthai sui dinga chitnate:** Pasion thugen minthang khatin, “*Pasion in vanzat hoi leh etlawm sangin; Ama Pasion siengthoupa ahiziehin vanzat siengthou poimaw zawhi*” chin ana gen ngai hi. Hagau mangthai sui a midangte Khrist kengbul a pui dingin chitna ding poimaw bangzat ahiei khat um hi:-
- a) **Hundamna ki theichetna kichientah nei:** “*Hundam hi ding kahi*” chi mai hilou in, “*Hundam ka hita*” chi a Laisienghtou kingahna kichientah nei mi ahi ding poimaw hi (Rom 5: 1, 8, 1Jn. 5:11-12). Tua banga hundam ahita dan a kitheichetna, a ni, a ha, a kum theichet ahoi a, tuate itheilou leh zong, a hun, zingkal maw? Suunlai maw? Nitah lam maw? Nitah maw? Zaanlai maw? Chielpi bawltu, thugentu, counselor thei ding ahi.

- b) **A hinkhuo leh Khrist Khantanhoi akituoh mi ahi ding ahi:** Mi tampiten, “*Piengtha na hileh na hinkhuo lah akiheng lamdang sia*” achi theima uhi. Mimal hinkhuo leh khantanhoi a kituoh ding ahi (Phil. 1:27, 1Thess. 2:10, 1:5). I mimal hinkhuo leh khantanhoi silbawltheina ei tunga zong akilah ding ahi.
- c) **Khrsit neilou zousie a mangthang hundam ngai ahi chi pomkip vai:** Laiseingthou in mi zousie mi khiel ahi achi kichientah a pom mi ahi kul hi. Pienken a mihoite hundam himai dinga koipen khu dihlou ahi (Mt. 23: 25-28, Lk. 18: 9-14, Jn. 3:1-18).
- d) **Jesu Khrist mai hundampa ahidan pomkip ding ahi:** Leitunga sakhuo dang mong mong a hundamna umlou ahi. Jesu Khrist bou ah Pa Pasion kungtun theina hundampa um sun ahi (Jn. 14: 6, Nasp. 4: 10-12, 1Tim. 2: 5-6). Khum hundamna khu Khrist khantanhoi tungtawn a nga ahi chi tahsan ding ahi (Rom 1:16, 1Tim. 1:15-16).
- e) **Pasion thu zah a silbawltheina muon ngam ding ahi:** Pasion thu in hundamna dinga mi pilsah thei a, silbawltheina hattah nei a (Heb. 4:12). Pasion nasem dingin bukim sah hi (2Thess. 3: 16-17, 2:15, 1Pet. 3:15).
- f) **Hagau Siengthou thopna (dimna) lawchinna thuguh a pom ding ahi:** pasian Thu a Hagau Siengthou in a zat leh silbawlthei in ga suong hi (1Thess. 1:5, Nasp. 1:8, Zak. 4:6), Peter leh Johan (Nasp. 4: 8, 31) leh Stephen (Nasp. 6: 5-15) te khu etsahna hoi mama ahi hi.
- g) **Thum gige leh thumna silbawltheina a kinga mi ahi ding ahi:** Jer. 33:3, “*Hinghan unelen, ka hing dawng dinga, tualeh na theingailou sil thupi leh sil kiphuol ka hing musah ding hi*” chin imu hi. Paul in, thupina angen zelzel a etton ding ahi (Rom 15: 30-32, Late 126:5).
- h) **Hagua mangthaite itna leh lainatna tahtah nei ding ahi:** Mangpa etton ding ahi (Mt. 9: 35-38, 23: 37-39, Lk. 23:

27-31). Pasion kunga Hagau mangthaite itna, Ama itdan a it theina nget ding ahi (Late 126: 5).

3. **Hagau mangthaite matna dinga Pasion in lampi sial (Late 126:6):** “*Kap kawm a bu chi puo a kuon khe ten lungnopna buphaite puo in nuom sa tahin ahing kinuale ngeingei ding hi*” chi imu hi (free translator). Tamna chiemte sil 5 a um hi. Tuate ahileh:-
 - a) **Hagau mangthaite lainatna:** “*Kap kawm*” achi in Hagau mangthaite lainatna puohnatna leh hepina, tualeh adinmun uh phawpina agen hi (Late 126:6).
 - b) **Hagau mangthaite sui dinga kalsuonna:** “*Kuon khie*” chi in Hagau mangthaite sui dinga kalsuonna agen hi. Taptung a Hagau kiman ngailou ahi kha thei, Ama umna mun vanai ngai hi (Mk. 1:17).
 - c) **Pasion thutah vanzat:** “*Haichi manpha puo*” chi in Pasion thu vanzat poimaw leh silbawltheina agen hi (Heb. 4:12). Kamsiem thu leh gentena hoi hilou in Pasion thu in a hundam thei ahi (2Tim. 3:16-17).
 - d) **Lawching ding theisa:** “*A buphaite puo in..... ahing kinualeh ngeingei ding*” chi in Hagau mangthai suite Pasion in a lawchingsah ahidan a hing hil hi. Kipan ngam in ium ding uoi?
 - e) **Hagau mangthai mante kiphana:** “*Nuom sa tahin ahing kinuale.... ding*” chi in Hagau mangthai mante kipahna agen hi (Phil. 4:1, 1Thess. 2:19-20, Lk. 15: 7, 10, 24).

Akhupsitna: Mangpa’n ana sem dinga ahing hundamte ihi ua, hutdamna athawn a itan, athawnma a genkhie a, Hagau mangthaite man dingin ahing sawl hi. I hinkhuo, ikampau, inasep te ah Hagau amngthai manthei ding in Mangpan hing mapui taken.

Dohante:

1. Pasion lungkimna pen bang ahiei?
 2. Eite bang bawl dinga hat ihiei?
 3. Theipitu ihi ding dan bangchi dan ahiei?
-

SIMMUN-19

HALTHANA (Revival)

Thuchin ding : “*Nasatah a suhgentheiin ka um hi, aw Mangpa, na thu bang zelin hing suhal in.*” Late 119: 107

Taangtel : Late 51:1-19, 139: 1-24, 80: 1-19, Ezk. 22:1-12, 23-31.

Zillai in atup : Halthana bang ahiei? chi theisiemmasah a Pasion apat halthana dihtah lunggul a ngen dinga zilsah ding ahi.

THUZIL DING:

Halthana ichi chiengin, Halthana ichi chiengin hagau lam a imute, thazawi nei meivam in a tuom bang a zawntatte halsah kia leh kiphawh sah kia a, khanglou a, tha hattha sah kia ding china ahi.. Chielpina leh halthana kibanglou ahi. Chielpina pen mi khiei, akhelna zieh ua shi dingte hutdamna ding tupna ahia, halthana ichi chiengin piengtha nuatol, Hagau lam a puasie leh basamte phawnghal thana ahi. Thutah toh, Mangpa thumang dinga kipumpieh thana jal a Khristian hindan ngaina kile kiana halthana ahi ichi thei uhi. Tualeh nuatolten Pasion umpina phawh thana, a thupina thei leh phawh in zatatna in dim uhi.

1. **Bangchi chienga halthana poimaw/ kism ahiei?** Haltha ichi chiemtena chi tuomtuom um thei hi, khumte lah ah a poimaw deute iki velthana dingin enkhawm vai:-

- a) **Khotang hinkhuo a kisie a, Pasion zatatna a umlou chiengin haltha pimaw/kism in poimaw mama hi china ahi:** Hiemngamna, zu khamna, numei leh pasal kal a thangtatna, angkawmna, damdawi khamthei bawltam, nu leh pate zatatna umlou, kinehsietna, maingalna, dihtatna leh siengthouna tawmseng, du-amna adimna. Angma khuolna adim, biehma ngaisahna tawm, thumna kikhopna a mitawm,

thalawm tawm, kikhopna a lasah thasietna a um chiengin halthana poimaw/ kism ahi.

- b) **Pasian itna itasap chiengin halthana poimaw/kism hi:** Pasian gam leh a dihtatna a masapen a koi ding iphawlonna (Kil. 2:4). Pasian thu in, Pasian khu ilungtang zousie i Hagau zousie leh ilungsim zousie a it ding chi ahi. Thamlouin, innsung mite sanga zong Pasian khu amasapen a um ding ahi (Lk. 14: 26). Mihing nuo izui a, Mangpa nuazuina itawp san chiengin Pasian itna tasam ihia, halthana ikism/pimaw mama hi.
- c) **Pasian tate lah a ki-itna itasap chiengin halthana poimaw/ kism hi:** Pasian tate lah a ki-itna itasap chiengin kigensietna, kipawl khenna, ki thangsietna, kihauna, zuou kigentuona, a pawlawng a kipawlna, lungsim tahtah kipiehlouna, angung khuolna, tuolthana, angkawmna, kiphubalana, lungsim a kihuoatna, kituolouna, leh kimillouna atam chiengin halthana poimaw/kism mama ahi (1Kor. 3: 1-4, Gal. 5:19-21).
- d) **Khristiante'n Hagau mangthaite itna a tahsap chiengin halthana poimaw/kism mama hi:** Hattuom sanga chielpina um nawnlou, missionary awlmawna leh gam miel ngaisahna um nawnlou, khotang a gilou leh mi khielte awlmawna um nawnlou, khotang sietna awlmawna dinga aumlou chiengin haltha hatuom khing-a nuatol ahi. Tuahun chiengin halthana poimaw/ kism taluo hi (Mt. 28: 19-20, Mk. 16:15-16, Nasp. 1:8).
- e) **Pasian silte sanga Kaisar (Khowel) silte a tungnun (I ngai khawjaw) chiengin halthana poimaw/ kism mama hi:** Laisiengthou sim sanga newspaper sim utzaw, TV a, news ngainuomzaw, Pasian thugen sanga leitung thugen ngai nuomzaw, lah gentamzaw, gentel kaisanga khosung kikhopnate ngai poimaw zaw, ZYO meeting, ZSP meeting, shigal, damlou ve, Laisiengthou sim sanga chielpi thugen

a kuon taimazaw hoina pi in pilvan ngai ding ahi, halthana poimaw/ kismah hi.

2. **Halthana nga/ tang dingdan:** 2Khangthute 7:14 ah, “*Ka min a kilou, ka mite, kingaangiem a, athum ua , Ka maipha asui ua, a umdan giloute uh aki heisan u’leh van a kipatin kana ngaikhe dinga, a khelna uh Ka ngaidam dinga, a gam uh Ka damsah ding hi*” chi ahi. Tam thu in thupi poimaw bangza ahiei khat ahing hil hi. Tuat khat:-

1. **Halthana poimaw/ kismah:** Pasion mite, piengthate, hundam tate china ahi. Pasion thu in, “*Ka min a kilou ka mite*” achi ahi. Piengthaloute’n chiehpina apoimaw ua, nuatolten halthana poimaw uhi (Kil. 2:4-5).

2. **Halthana ding lampite:**

a) **Kingaangiemna:** ichi khu, kingaangiemna ahi. Kingaangiemna ichi kisahtheina le lam ahi. Ki ngaangiemna kichi ihina sanga ngeimzaw china ahi sia; Pasion mai a ihina tah kimuchetna ahi. Pasion mitmu a, kingaangiemna ahi. Kam a gen ahi sia, halthana dinga poimaw masapen ahi.

b) **Thumna:** Laisiengthou in, “.... *A thum ua*” chi in ahing hil hi. Thumna ma a kingaangiemna a um hi. Khum khu, kingaangiem a thumte Pasion dawnnop leh dawnthei thumna ahi, china ahi. Pharisaipa thumna bang hilou a, sia dongpa thumna bang china ahi (Lk. 18: 9-14).

c) **Pasion meel sui:** Kingaangiem a thum khu Pasion meel suina dinga thumna ahi. Pasion meel heisung ah a um diei? Laisiengthou sunga a deidan leh Pasion hinate mu tum a suina in Pasion meel imu thei ding uhi. Gamlah, singlah leh mangmuna (vision) tangtawn a Pasion meel sui lou in, Laisiengthou sunga pat Pasion meel isui ding uh ahi. Haltha iut leh!

- d) **Kisia a kiheina:** Kamsang Isai banga Pasion meel vah a ki-en chien a, ikhelnate kisia a ki heimangsan apoimaw mama ahi (Isai. 6:1-8, 55:7, 1:18). Kisia a kiheina pang lou in Pasion ngaidamna ki tang thei lou hi. Halhana kitang theilou semsem ding ahi.
3. **Halhana gaa dingte:** Halhana gaa dingte chi 3 imu thei uhi. Khumte ahileh:-
- a) **Thumna dawna ahi:** Laisiengthou in, “*Van a patin, kana ngaikhe dinga, a thumna bangbang un ka dawng ding hi*” (Jer. 33:3).
- b) **Khiel ngaidamna:** Khelna a ki puon ua, a thuphatawi bangbang un a khelna uh, alienseng, aneuseng umlou in ka ngaidam ding hi chi ahi (1Jn. 1:9).
- c) **Khotang damna leh guoljawlna:** Pasion thu in, “*A gam uh ka damsah ding*” achi hi (2Khang. 7:14). Khotang a muonna leh bitna, innsung kilemna, kituona, tahsa leh Hagau lam a hausatna in ka vaua ding hi china ahi.

Athukhupsitna: Pasion vena ilah uah ahing tungzel zel a, ihampha uhi. Khat veivei chiengin a khuakhat, biel khat, hattuom khenkhat ah halhana hing tung zel, kipah ahuoi hi. Chielpinate, crusade, campite inei ua, Mangpa vena ahing tung zel hi. Hinanleh igam pumpi et a halhana hingtung nailou a de aw chi in um hi. Pasion vena a tha a tanga, Hagau lam halhana leh khatlawhna inga theina ding un, Pasion meel sui chietlei iut uhi.

Dohnate:

1. Chielpina bang e?
2. Halhana ichi bang e?
3. Halhana dinga poimaw masapen khu bang e?

SIMMUN-20

HATTUOM KITHUNUNNA (Church Discipline)

Thuchin ding : *“Thununna khat poupou pen a kithuoh laitahin kipahhuoiin alangsih a, hasiethuoiin alangzaw hi. Ahivangin, anua chiengin, tuabangte thununna nuoi a ki tutlut joute dingin, gaa asuong a, lungmuon dihtatna asuoh zel hi.”* Heb. 12:11

Taangtel : Heb. 12:1-17, 1Kor. 5:1-13.

Zillai in atup : Hattuom thununna ki chi hattuum sienthoua ding leh Pasion min a mite lah ah pahtoi a aum ding ngimna ahi chi theisah ding ahi.

THUZIL DING:

Dr. Albert Douglas in, *“Hattuom thununna kichi khuo(weather) hun bang ahi, hatangpi’n a kigen zelna a, azang tahtah ngam umlou lam ahi”* ana chi hi. Thununna kichi hattuum mite umdanhoi leh siengthou Pasion lungtuoh dinga hintheina dinga langtang a khelnate kibawlhoi dinga deisahna gawtnate ahi chi thei ahi. Hattuom masate’n sienthoua anei jie un a thahat ua, tulai hattuum mite tahsa mi hina in a dimua ua, khelna poisahna atawm a ihat sih uhi. Hattuom thununna nuai a umpen hasa sim nanleh Pasion lungkimna ahi.

- 1. Hattuom thununna thu bang hun a hil ding e?** Hithei leh hattuum thununna pen mi khat a pientha a, bapisma atan ma a thuhil ahoi hi. Bapisma tang dingte Pastor in thuhilna apieh jou chienga khum dungjui a kizilsah ding ahi. Mi khat hattuum member piching ahi dungjui a thununna ichi bang ahiei chi a thei masa ding poimaw ahi. Aziehpén hattuum sunga umdan leh gamtatdan dinga theisiem masah poimaw ahi.

2. **Hattuom thununna in atup leh angimte:** Hattuom thununna in atup leh angim poimaw diate tambang ahi:-

- a) Hattuom siengthouna ding atum hi (Nasp. 5:1-11, 15:1-31). Mi siengthoute Hagau lam hinkhuo hoina ding, kibawl-hoina ding, leitung mite lah a theipitu hina nasepna lam a sienthouna ding, hatna ding, hattuum dembanglou a aum na ding atup ahi (Rom 12:17, 1Kor. 14: 3-25).
- b) Pasion mite itna leh hoi ding deisahna genkhietna ahi (Deut. 8:5, Pau. 19:18, Heb. 12:6, Kil. 3:19). Thununna daan te khu Laisiengthou pansan a kibawl ahiziehin Laisiengthou zilsahna palsan mite thununna ahi (1Kor. 5:1-8).

3. **Hattuom thununna kizatna sung:**

- a) Hattuom in leitung mite lah a “*Miel nasep pha tuomloute*” (Epha. 5:11). Thu a vauhil/ taihilna pieh ding leh mi zousie kunga khantanhoi gen ding amawpuohna hinapi in (Mt. 28: 19-20), hattuum in hattuumte loungal thununna ape theisih hi (1Kor. 5:12-13).
- b) Ki vaihawmna lam a ki thununna in nasem dinga hattuum in a goih(hire), semtute nasep dan ginat leh gintlou thu a thununna agen hi (Jer. 48:10).
- c) Gingu khat leh khat kikal a thusie-lasie leh khristian hindan a Laisiengthou thuhilna palsan a khielte tunga thununna ahi.

4. **Hattuom in thununna apieh poimaw khelnate:**

- a) Thuhilna dihrou paai leh thedal a hattuum peidan leh ki thuhilna kala gamtatnate ahi (2Kor. 11:4, Gal. 1:6-8, 1Tim. 1:19, 5:8, Tita 3:10, 2Pet. 2:1-3, 14-22, 2Jn. 10:11).
- b) Nu leh pa kal a khelnate:- (i) Kingainanin, kiteng loupia numei leh pasal lumkhawm a, kipawlna. (ii) Angkawmna, pasal ahiei numei ahiei, khatzawzaw in mituom khat poupou toh aki ngai leh khumkhu puona ahi (1Kor. 5:1-10, 2Kor.

- 6:11), (iii) Pasal leh pasal kingaina, ganhing leh mihing kingainate thunun ding ahi (Rom 1:24-27, Deut. 27:21).
- c) Tuolthat (Mi thana). Mihing leh ganhing hinna mite tunga huham leh hiemngam tah a khut hahna khelna ahi (Mt. 15: 19, Rom 1:29).
- d) Sum thu a khelnate, lepguhna, kumpi van khaam a sum donna, sum hoilou a kimawlna, sum thu amuonhuoi louna, zuoutatna zousie (1Kor. 1:11, Eph. 4:28, Rom 13:10, 1Tim. 6:10) leh huoihamna (Kol. 3:5, Eph. 5: 2, 2Tim. 3:2).
- e) Zu kham, zu juohna, khamthei-nguithei damdawi leh adang dang ngaina leh zuohna (Pau. 20:1 Lk. 21:34, Rom 13: 13, Gal. 5: 21, Eph. 5:18).
- f) Pasion ngaisah louna hinkhuo a kizatna zousie (Rom 13: 13, Kol. 3:8-9, 2Tim. 3:1-7, 2Pet. 2:7, Juda 8).
- g) Guttana leh simtham a gamtatnate (Rom 2: 21-23).
- h) Dawi nasep muonna leh tahsanna leh zatna zousie (Levt. 19: 26, 31, Isai. 8:19-20) (i.e. dawi thugennate- khutlam etsahna) chite leh adang dang ahuop hi.
- i) Hattuom daan palsan a kitai, kigu chite ahi.
5. **Thununna pieh hunsung:** Hattuom in thununna pieh zousie hattuum kipuihuoina daan bu a bang ahi ding ahi. Ahunchin jounuo chienga siensah (lahlut) ngeingei ding china ahi. Kisiana leh kisia tahtahna a kilatna bang banga siensahna (lahlutna) ngaituo thei hita ding china ahi.

Akhupsitna: hattuum thununna bang ahiei? Atuppen bang chibang khelnate thununna a, pie a, bang chibang thununna pie, siensah theina hun itheita. Thununna toh kisai izilna ah koima thununna tuoh dingin um sih henlen, thununna theina khelnate apat siengthou chiet lei chi idei ahi. Thununthei khelnate lah a um a, a ki thununsih chi ding zong a um ahi. Hinanleh hattuum in tuate zong dihsah lou

a, hoisa lou ahi chi theichetna a, izah ding ahi. Hattuum thununthei khelnate lah ah kiveng chiet vai.

Dohnate:

1. Hattuum thununnate bang hun chienga zilsah ding e?
 2. Ki vaihawmna thununna in bangtan/ heitan ahuom ei?
-

SIMMUN-21

SABATH NI HILOU IN, MANGPA NI AHI APOIMAW

Thuchin ding : *“Tuaziehin neh leh dawn thu ahiei, pawit tungtang thu ahiei, hatha thu ahiei, ahisihleh KHAWLNI thu ahiei, ah koiman noute hing mawsah sih u’heh. Tuate pen sil hingtung dingte him/liim ahi, hinanleh ataht tah khu KHRIST ahi.”* Kolosa 2:16-17

Taangtel : Siem. 2:1-3, Exo. 31:12-13, 16-17, Mt. 12:9-13, Mk. 2:23-28.

Zillai in atup : Thuhun Lui ah Sabath. Israelte toh Pasion kikal a thuhun Kum Sang Leenggam etsahna ahia, Thuhun Tha hun in Sabath tan (observe) angaisia, MANGPA NI a biehna leh Pasion deilam nasep ding ahi chi theisiem sah ding ahi.

THUZIL DING:

Tuni tannin mitampite Hagau lam mit setan in suhmielsah a dan thupieh zui a hundamna nga ding kisa uhi. Adiehin Sabtah Ni tan bang hing uong bawl mama uhi. Sabath ni tan zieh a piengtha ding, vangam kai ding chi zilsahna Laisiengthou ah a kimu sih hi. Mihing zousie Gentel in pieng masa a, Jakob apat Israel hing pieng an hi. Israelte Pasion in namteel a aneina zong deisah tuomzieh hilou in, amasa zaw ding, Ama theipitu masa zaw dinga Mangpa’n ateel ahi lel uhi. Tuaziehin tu hun a Sabath tan (observe) ding hilouin Mangpa Ni Jesu Khrist khelna manpie a shina apat a thawkiana khu biehna Ni (day) leh Pasion nasepna Ni (day) a zat ding ahi chi ithitel/ theisiem mama uh poimaw ahi. Khtirst tatkhetna nasep pansan a Hagau lam hundamna a khawhna zong agen hi.

- 1. Mangpa Ni (day) hing kipatdan:** Mangpa ni (Pasion Ni) Thuhun Tha biehna Ni ahi. Hinanleh Thuhun Lui Sabbath toh akizopna khat a um hi. Siem. 2:2-3 ah Mangpa Pasion in asil-

siemna nasep zousie zou a a khawlna imu hi. Hinanleh, Sabbath thawhna pen mihing kunga kum 2500 nualam in piehin um pan hi (Exo. 20:8-10). Exo. 16:23 ah Sabbath Ni tan na (observed) dan khat ana um hi. Dan Thupieh 10te akipieh laiin Sabbath tanna pen thupieh lah ah kikhelkha hi (Exo. 20:8). Thuhun Lui laiin Sabbath Ni pen nasep khawlna Ni ahia, biehu veni, sillat leh biehu toh akisai kha sih hi. Khum Ni in nasem gim ganhingte, suohte, leh mipite khawl/ tawldam uhi. Sabbath Ni pen Israelte leh Pasian kikal a thuhun ahi (Exo. 31:13, 17). Tulai a khenkhatte mabangin Mangpa Jesu hunlaiin Pharisaite'n zui zoulou sasa in Sabbath a min in ana tang (observed) uhi. Nasepte laibu sung i-et chiengin hattuom masate'n biehu Ni in Nipi kal khat a Ni masapen ana zang uh ahi chi a kitel mama hi (Nasp. 20: 7 cf. Mt. 28: 1, Mk. 16: 2, 9, Lk. 18: 12, 1Kor. 16:2). Jesu Khrist thawkiana Ni ahi.

2. **Thuhun Lui hun a Sabbath Ni tan dingdan thupite:** Tulai Sabbath pawl tuomtuom te'n Sabbath Ni tang (observe) kichi poupou in a tan ding dan tahin atang zou sih uhi. Hinanleh aman hamsiet kitun lel ahi uhi.

Thuhun Lui a Sabbath Ni tan dan:-

- a) Suohte leh ganhingte zousie na sepsah vawtlou uhi (Exo. 20:10).
- b) Na bangma asem sih ua, A ann neh ding uh zong septopni in ahuon uhi (Exo. 20:10).
- c) Sabbath Ni in van lei leh van zuoh kichi mawngmawng umlou hi (Neh. 10:31, 13:15-17).
- d) Sabbath Ni a puohgih puo khaam ahi (Neh. 13:19, Jer. 17:21).
- e) Sabbath Ni a bu lah kichi zong bawllou uhi (Exo. 34:21).
- f) Sabbath Ni bawsiet shina khop khelna ahia, suonga selup ahi uhi (Num. 15: 32-36).

3. **Sabbath toh kisai a Khrist ngaidan:** Mangpa'n Sabbath Ni in sillam dang tampi a bawl a damloute adamsah jalin Judate a tungah a thangpai ua, "*Sabbath bawtsepa*" chiin angawh uhi. Aman Ama Jesu bang chibangin ahilchien ei, i-en khawm ding uhi.
- Jesu Khrist in khawl Ni (Sabbath) Mangpa ah ahidan agen a, "*Mihing khu khawl Ni Mangpa ahingal a*" (Mt. 12: 8, Mk. 2:28). Jesu Khrist, Sabbath tunga thunei ahi chi i mu thei uhi. Tuajiehin Sabbath pen Nipi kal a dinga Ni masapen dinga heh theina thuneina anei mama hi.
 - Jesu Sabbath Ni a na hoisep sihdih ahidan agen hi (Mt. 12:11). Belam Sabbath Ni a guom a kie lakhiet ding ahi chi hi.
 - Jesu'n khawl Ni tan sanga mihing manpha zaw ahi chiin khut zeng te asudam hi (Mt. 12:12-13). Mihing tasap poimaw leh aphatuompi ding masapen dingin khawl Ni asieng chi Mangpa deidan ahi.
 - Mangpa Jesu'n khawl Ni pen mihing a dinga bawl ahia, mihing pen khawl Ni a dinga bawl ahi sih (Mt. 2: 27) ana chi hi.
4. **Hattuom masate'n Sabbath tang louin Mangpa Ni, biehna ni in azang uhi:**
- Hattuom masaten Mangpa Ni (Pasian Ni) in kikhopna in anei ua, Sabbath atang tuon sih uhi.
 - Hattuom masaten Mangpa Ni, Nipi kal khat a ni masapen in kikhawm in thawlawm ala khawm uhi (1Kor. 16:2).
 - Sabbath Ni beinua khawvah kuon/ phalvah in nipi kal a ni masapen in hanve in ahaw uh (Mt. 28:1). Khrist in Judate Sabbath azah zou in a thoukia hi. Khum Ni, Mngpa Ni, nipi ni masapen in Johan hakhiet in a um hi. Mangpa thawkia Ni ahi (Kil. 1:10).
 - Nipi kal a ni masapen in Johan hakhiet in a um hi (Kil. 1:10).

5. Khrist in Mangpa Ni (Pasian Ni) azatdan:

- a) Jesu'n Mary kap a um ahamuon hi (Jn. 20:13).
- b) Jesu anuajui toh mi nite tetoh tai 7 a gamla ah apei uh (Lk. 24:13).
- c) Nuajui nite toh Laisiengthou kizilsah uhi (Lk. 24: 24-31).
- d) Jesu'n nuajui dangte kungah thu avaihah hi (Mt. 28:10).
- e) Jesu'n a nuajui Peter toh kimuna anei hi (Lk. 24: 34).
- f) Nuajui sawm leh ni te toh kimu in ann anekhawm uhi (Lk. 24: 36-45).

6. Sabbath leh Mangpa Ni teekahna:

- a) Sabbath, Nipi kal a dinga, ani sagi ni ahia, Mangpa Ni, Nipi kal a dinga ni khatna ahi.
- b) Sabbath in silsiemte zaw a khawlna agen a, Mangpa Ni pen Khrist thawkiana Ni thei gigena agen hi.
- c) Sabbath Ni in Pasian a khawla, Mangpa Ni in Jesu Khrist silhoi bawlin abuoimama hi.
- d) Sabbath Ni in silsiemte zawsieng ahidan a thei sah a, Mangpa Ni in tatkhetna nasep zawsieng ahidan atheisah hi.
- e) Sabbath Ni khu dan leh thupieha awhna ahia, Mangpa Ni pen eima utthu a bieha Ni ahi.
- f) Sabbath Ni pen Judate a ahia, Mangpa Ni pen Khrist a hatuom/ gingtute a ahi.

Akhupsitna: Khristian bieha Mangpa Ni (Pasian Ni) a inei uh adihna ahi. Tulai Sabbath Ni chite a peikhiel leh a thu khiel ahi uhi. Ginna chi tuomtuom hui in ahing mut chiengin ling paipai lou ding ahi. khrist tatkhetna Hagau lam khawlna tangte a dingin Sabbath tan angaisih. Hutdamna hileh Khrist Hagau lam khawlna ah na lut a, Aman ana tanzousa khu set thei ahi.

Dohnte:

1. Israelte bangzieha teelmasah a um uh e?
 2. Sabbath Ni koi kal thuhun ahiei?
 3. Bangzieha Sabbath tan ngailou ahiei?
-

SIMMUN-22

KHRISTIAN KITEENNA

Thuchin ding : *“Mi zousie lah a kiteenna zatatin um henlen, tualeh lupna zong suhbuoh louin um heh, aziehpén numei pasal kaal a thangtatte leh angkawmte tungah Pasion in thukhenna abawl ding hi.”* Hebrute 13:4

Taangtel : Siewm. 2:18-25, Mt. 19:3-12.

Zillai in atup : Khristian kiteenna, hattuom zui dinga abawl koi pouin zatat a zuidih tup chiet ding chi theiseim sah ding ahi..

THUZIL DING:

Khristian innkuon bawl na dingin abul patdih ngai ahi. Khrist innkuon patna dingin khristian kiteenna apat deihuoi in kilawm sese hi. Lai siengthou pansan in *“Mi zousie lah ah Kiteenna pahtawi (zatat) in um hen”* chi’n ahing hil hi (Heb. 13:4). Khristian ten dansiengthou a kiteenna ipahtawi a, itawi sanga, izatat ding ahi. Mihingte ganhingte sanga tungnung/ manphazaw ihijiehun tawndan leh tatdan kilawm khristian ihima tham in ana um jouta hi. Khristian ihinua diehdiehin mihing ihina banah khristian ihina zieh a tawndan leh gamtat kilawmzaw izui ding kilawm in hoi sem hi. Kiguuh, kingai, zawltai kichite ganhingte umdingdan a kilawm ahi. Bang chibanga khristian kiteenna zatat thei ding ihiei chi thupi li in isui khawm ding uhi.

1. **Khristian dansiengthou a kiteeng in:-** Khristian dansiengthou a kiteenna khu manpha in kilawm a, khum sanga kilawmzaw kiteenna ding dan umlou hi. Aziehpén:

a) **Khristian kiteenna a Pasion min kisiel hi:** Kiteendan dangte ah Pasion min kisiel in kilou kha lou hi. Pasion thu in, *“.... Nasep nabawl zousie uh Pasion thupina dingin bawlun”* (1Kor. 10:31) achi hi. Silhoi bawlte khu a Pa van a um pahtawi dingte ahi (Mt. 5:16).

- b) **Khrist a pahtawi hi:** Khristian kiteenna khu Jesu Khrist leh a hattuumt kiteenna ding etsahna ahia, Khrist aphatawi ahi (Epha. 5: 27-28, Jn. 3: 29, Kil. 19: 7-8, 21:9).
- c) **Hattuum dan zuina ahiziehin hattuum a pahtawi ahi:** Hattuum in Laisiengthou toh kituoh a kilawmtah a dan abawlzuiten hattuum apahtawi hi (1Pet. 2:13, 2Kor. 11:1-2).
- d) **Nu leh Pate a pahtawi ahi:** Pasion thu in nu leh pate zatat a umdan gamtatdan nasep silbawl a pahtawi dingin ahing hil hi (Deut. 5:16, Exo. 20: 12).
- e) **A kiteengte a pahtawi hi:** Nu leh pate thumanna, hattuum deidan a um, amau kithuzaw ahiziehun amau leh amau a kipahtawi uhi (Phil. 1:27, 2Kor.6: 14-18, 1Kor. 6: 19-20).
- f) **Khanglaite zousie a pahtawi hi:** Khanlai hun a Pasion thu a kilawm tah a gamtatna ahiziehin ikhanglai hina leh khanglaite a pahtawi hi (Ezr. 12:1).
2. **Kiteenna thuchiem amonhuoi hi:** Pasion deidan kiteenna ah numei khat leh pasal khat kiteenna ahi. Khumban ah damsung daiding kiteenna ahi (Siem. 2:21-24, Mt. 19: 3-7).
- a) **Pasal khat leh numei khat kiteen (monogamy) ahi ding ahi (Mt. 19: 4-5):** Zi tampi nei Pasion in phal ngailou hi. Mihingte ginatlou zieh ahi bou hi.
- b) **Shina loungal a kikhen thei ding umlou kiteenna ahi (Mt. 19:6):** Chi tuhkippen kiteenna thuchiem muonhuoina ahi.
- c) **Angkawmlou ding ahi (Exo. 20:17):** Thuhun Lui hunlai ngielin angkawmte a ni ua suong a selup ahi uhi (Siempudan 20:10). Angkawmna leh michit zaw louna khu kikhentheina umsun ahi (Mt. 19:9, 12).
- d) **Kikhen/ kikhul lou ding ahi:** Kikhul/ kikhen khu thutah louna leh muonhuoi louna ahia, chettheina, tuoh phatna leh vangphatna hilou in “*eima leh eima kihamsietna leh pusa*

pai” chientena ahi. Damsung leh shinua a zong Pasion thukhenna tuoh theina ahi (Mal. 2:13-16, Heb. 13: 4).

- e) **Ki-it leh kidethawtah a kikepzing ding ahi (Epha. 5:22-23, Kol. 3:18-19, 1Pet. 3:1-7):** Nupa ki-itsiem leh kideithawte mi hampaha, nuomsa, leh guoljawlna tangahi uhi (Late 133:1, 128: 1-6).

3. **Kiteenna siltupte tangtunsahn ahi:** Pasion in kiteenna a siltup poiwaw leh kichientah nei ahi. Khumte suh tangtun khu kiteenna pahtawi theina hoi mama ahi uhi.

- a) **Pasion batpi suong ding leh tangsawn sah ding ahi (Siem. 1:26-27, 2:7):** Pasal leh numei kiteenga umkhamwte tangtawn a Pasion batpi suongsawn sah ding leh tansawn ding khu Pasion siltup leh duthusam ahi (ei hah leh suon nei a Pasion batpi ta-le-nau nei ua gen ahi). Khelna in asusiet nua a zong Khrist a siemtha a iumna khu tuami ma ahi (Epha. 4:2-24, Kol. 3:8-10, 2Kor. 3:17-18).
- b) **Leitunga Pasion vaihawmna panpitu ding ahi (Siem. 1:28, Late 8: 4-8):** Mihingte Pasion silsiemte lah a tungnungpen ahia, Pasion thuneina Ama Pasion deidan a zanga leitunga vaihawma kemtu muonhuoi hi ding ahi, mipi vannei (Public property) kichi Pasion neisa ahia, mipi sum (public Money) ichi zong Pasion sum ahi. A zatdan ah pilvang chiet vai.
- c) **Numei leh pasal (nupate) kithuokhawm ding ahi (Siem. 2: 18):** Khat tang a um khu thawmhau huoiin lunglen huoi hi. Adam thawmhauna a theipi in Pasion in alawm ding leh a panpitu ding a kithuopi numei Evi apieh hi (Siem. 2:18, 21-25).
- d) **Nupa a pangkhawm ding ahi (Thugenpa 4:9-11):** Sep-le-bawl ah, damsung khawsahna lam chinteng a pangkhawm a, Hagau lam leh tahsa lam a kihutuoh ding ahi. Apangkhawm theilou nupa khu a vangsie, hepihuoi leh hamse thuoh nupate ahi uhi.

- e) **Numei leh pasal kipawlna siengthou leh nuomtah zanga kepbit ding ahi (1Kor. 7: 2-5):** Numei hina leh pasal hina thu a thangatnate Pasion in adeisih, leitung dmsunga thuhna/gawtna apieh paipaite ahi (Siem. 6: 1-22, 19: 1-11). Etsahna in Sodom leh Gomorate ahi.
- f) **Leitung ah mihingte hing kisuonsawn ding ahi (Siem. 1:28):** Pasion in mihingte punga tampi pha a leitung luodim ding leh, ha-le-suon nei ding mawnga ase hi. Pasion in a siltup tangtunsahna dingin Eden huon ah numei leh pasal kiteenna ana pan hi.
- g) **Pasion ngaisah ha-le-suon nei ding khu kiteenna a Pasion siltup poimaw pen ahi (Mal. 2:15, Late 78: 1-8, 128:1-6):** Nupa khu Pasion in Ama ngaisah ding in tanu, tapa suongkhe dinga ahing bawl ahi chi i manghillou ding uh ahi.

Akhupsitna: Khristian kiteenna pahtawi leh zatat a a um theina ding thupi thum tomkim tahin igen a, adang tampi gending a um nalai tham ding hi. Tu tunga izilthei tam teng ahi. Khristian ihi zieh un iki teenna khu hattuom dansiengthou a kiteenna ahi ding ahi. Mihing ihia, ganhingte umdan isutlou ding ahi. Pasion giing in a kilawm leh siengthou tahin ikhanglai hun in ikikem siengthou ding uhi. Tua khu eite a dinga nopsatna, kipahna leh muonhuoina lampi ahi pai hi. Kiteenna nei poimaw ahi chi phawhmasa vai. Khumzou chiengin Pasion siltupte tangtun ding imawpuohna ahilam imanghil lou ding uh ahi.

Dohnate:

1. Khristianten izatat ding uh khu bang ahiei?
 2. Kiteenna thuchiem muonhuoina bang ahiei?
 3. Khrsitiante kiteenna pahtawi theina lam thumte bang bang ahiei?
-

SIMMUN-23

NU LEH PATE ZATATNA

Thuchin ding : *“Mangpa na Pasion in ahingpiehna gam a na nite asawt theina dingin, na nu leh pate zatatin.”*
Pawtdohna 20: 22-25

Taangtel : Pau. 3:1-8, 6:20-23, 23: 22-25.

Zillai in atup : Pasion thupieh poimaw mama damsawtna ding leh damsunga lawchinna leh thupha inga theina dinga nu leh pate zatat chi itheisiem sah ding ahi.

THUZIL DING:

DAN Thupieh 10te isim leh amasa thumte Pasion toh kikal thu lieuliau ahia, alina pan zeh leh tan (cermorial law) ahi. A ngana pen innkuon toh kisai ahia, guhna pat sawmtan in mihingte toh kisai/kikal thu ahi. Khum akigielin Pasion toh ikal adih theina ding leh imi hinpite toh ikikal a din theina dingin hinkhuo sung toh kisai a, *“Nu leh Pa”* zattana poimaw ahi chi imu thei uhi. Khumijieh in Pasion in leitunga damsawtna leh nopsahna itan theina dinga *“Nu leh Pa”* zatat dingin thu ahingpie hi. *“ZATAT”* ichi chiengin amaute hina thei a, eima hina zong thei a, atan ding uh kilawm piehna agen ahi. Nu leh pate bangchi zatat ding ihiei?

1. **Nu leh pate pumpi (tahsa) izatat ding ahi:** Tuizin tunzou a Noah leh a innkuonte ahing ki tunding kia lai un, Noah khu uoi-in kham ahinglum khiel kha hi (Siem. 9:22). Kanaante suongpa Ham in apa aguohtang umkhu amu a, dawnse louin inn pawlam ah apawtsan a, unaute Sem leh Japhet ava hil hi (Siem. 9:23). Aman apa uh guohtang a um en ngamlouin puonkhat anuo lam uh kilezawn in ava khu uhi. Noah a hingkhanglou tah in a thei ta a, Ham ahamsiet a, Sem leh Japhet aguohtang hi (Siem. 9: 23-27). Tulaiin khenkhatte'n nu leh pa simmaw in amusit jel ua, avua jong um nalai moh hi. Pasion in khum bangte shisah ding

chi hi. (Exo. 21:15, 17, Deut. 21: 18-23). Siempu Eli taten apa azatat sih ua asietna uh a thupi mama (1Sam. 2:12-36). Nu leh pa simmaw a atung ua giloute sietna ding Pasion thu in ana tam gen mama hi (Pau. 19: 26, 20:20, 30:17). I nu leh pate pumpi (body) izatat a, iguot a ideithaw ding ahi.

2. **Nu leh pate thumanna bukim a izatat ding ahi:** Mihingte izatatte thu kimang hi. A thu inielte izatat loudan etsahna ahi. Nu leh pa thu iman ding dan “.... *Bangkim ah na nu leh pate uh thu mang un, khum khu Mangpa patatlam ahi*” (Kol. 3:20). Nuom isahna leh i utnate i mang ua, nuom isah louite i utlounate i manglou ding chi hilou hi. Nu leh pa thuman sildih (ahi ding mawng) ahi (Epha. 6:1). Nasep silbawl, laisim umdan, gamtatna, zi leh ta suina ding thu ah zong, iman ding ahi.

3. **Nu leh pate minpha kusahin izatat ding ahi:** Tate’n gamtat, umdan, siemzilna, sep-le-bawl a nu leh pate min phatna kusah in izatat in ipahtawi ding uh ahi (Diut. 5:16). Naupang khatin lawchinna tungtuong anei chiengin a nu leh pate a pahtawi a, amin hoi uhi. Zu kham, ann-kham, sa khama kitom, kikou, kisiel a a um chiengun nu leh pate muolphou sah a, a mindai sah uhi (Pau. 17:25, 19:26).

Khuo khat a mi zukham a hiei, damdoi kham ahiei in um leh amin bang? A nu leh pa koi? Koi khuomi? Bang behte chi nangawn kidong kheukhou a aban ban in minse sahsuoh hi. I nu leh pate minpha ngasahin zatatin pahtawi vai (Pau. 23:25). Nu leh pate pahtawi ding in iumdan leh gamtat ah pilvang va ui.

4. **Nu leh pate deithaw tah a kep ding leh zatat ding ahi:** Nu leh pate kep-le-don, nat-le-sat a khoi, imutlou zaan tampi-a mipiching suoh ihi. Tuaziehin nu leh pate a upat ua ahatnawnlou chiengun ikep thuh ding ahi. Innkuon gouluotu hi-a, nu leh pa umpi theilou leh kemtheiloute khu amawpuohna uh zoulou hi

uhi (Pau. 23: 22, 25). Pasal nei a teehpi leh teehpu it theilou bang atam mama hi. A pasal a itleh asuongtute a it ding sil kilawm leh dih ahi. Ama pasal singhawm leh suonghawm a pieng hileh vang nu leh pa neilou ding ahi.

Zi nei nuoh chienga nu leh pa huotbawl bang um jel ta leuleu uhi. Khum khu sildih hi theilou hi. I zi leh ipasal mai it ding hilou hi. *“Ka nu leh kapa mawseng, kikem theilou”* kichi iza paipai uhi. Amau sanga mawzaw kemtheiloute, pasal leh zipen amawzaw suoh uhi. Nu leh pa puonse teng thuop khum ding hilou ahi. It tah leh deithawtah a kep a, muolliemsah ding ahi. Khum khu guoljawlna lampi um sun ahi.

Akhupsitna: Laisiengthou in pa mai in ahiei, ahilou leh nu mai zatatin achi sih hi. *“Na Nu leh na Pa”* achizaw hi. Pa mai zatat a Nu simmaw adihsih hi. Tualeh nu mai zatat a Pa simmaw zong a dihlou ahi. Ta-le-Pa pangkhawm a nu suoh banga bawl zong adihsih hi. Nu-le-Tate pangkhawm a Pa guollelsah zong adihsih hi. Nu leh pate pilin, mawlta leh uhzong I zatat ding khu Pasian thupieh leh guoljawlna ahi (Epha. 6: 1-3).

Dohnate:

1. Leitunga nopsahna ding leh damsawtna ding bang ahiei?
 2. Thupieh sawmte amasapente banglam genna ahiei?
 3. Damsawtna leh hamphatna bul khu bang ahiei?
-

SIMMUN-24

THUHUN THA MISSIONARY NASEP

Thuchin ding : *“Leitung pumpi ah pei unlen, silsiem chinteng kungah khantanhoi gen un.”* Mak. 16:15

Taangtel : Siem. 12: 1-3, Late 2:1-12, Mt. 28: 16-20.

Zillai in atup : Jesu Khrist hundamna khantanhoi silsiem zousiete kunga khristian zousie in gen ding imawpuohna ahi chi theisiemsah ding ahi.

THUZIL DING:

Pasian in mikhielte hundamna ding leh tunding na dinga anasep zousie Pasian mission ahi. Khelna in Pasian leh mihing a kikhen-sah a, khum zopkiana nasep khu Missionary nasep ahi. Pasain in Thuhun Lui hunlaiin khum nasem dingin mimal khenkhat leh Israel a minam in ateel hi. Pasian teelna pen deisahtuom nei zieh hilou in Ama deina nasem masa dinga ateel ahizaw hi. Thuhun Tha hun ah khum makhu Pasian tangtawn siltup hattuumte nasep dinga poimawpen ahi. Pasian in Hagau mangthai sui a hutdamna huonga puilut dingin mi zousie mawpuohna hingpie in missionary a kuon dingin hanta (calling) leh sawlna dihtah anei hi (Rom 10: 14-15).

1. **Hattuum Missions siltup hattuum phukhiet ahi:** Mt. 28: 19-20 *“Kuon unlen, namchin lah apan nuazui ding siem unlen, Pa leh Tapa leh Hagau Siengthou min in baptis unlen, thu Ka hingpie zousie pom dingin thuhil un. Tualeh ngai un, Kei tangtawnin, khovel top tanpha in zong, na kung uah Ka um zing ding”* chi khu Jesu Khrist thupieh imu uhi. Tami thu agen poimawpen khu a thupieh *“nuazuite bawl ding”* chi ahi. *“Kuon unlen, Baptis unlen, thuhil un”* ki chite khum thu a kikhaikhawm ahi. *“Kuon un”* chi in Hagau mangthaite aum na mun ua suikhiet ding ahidan agen hi. *“Baptis un”* chi in ahing pientha chieng ua, akimulou lam a Hagau a baptisma atan uh toh kiton dinga pawlam muthei a

tahlat agen hi. “*Nuazui leh thuhil un*” achi in kep zuina, hattuom a dinkhietsahna agen hi. Piengthate nuosie mailou a kepzui a zilsahna hoitah a nei a hattuom a dinkhietsah khu missionary nnasepna a siltup lienpen ahi.

2. **Hattuom Missions khovel pumpi a ding ahi:** Namchin lah apat nuazuite bawl dinga thupieh ihi (Mt. 28: 19). Namchin ichi chiengin chichin, haamchin leh namchin khentuom neilou in mi zousie ahupsieng kei hi. Tua mai hilouin leitung buppi adia Missions ahina (Nasp. 1:8) ah ki chientah in akilang hi. Tuana nasepna a tha hanta ingana dingin “*Hagau Sienghou*” adimna leh thopna, a nasep dingte sawltahte leh gingtu masate “*Ka thu theipite nahi ding uh*” chiin ana gen a, Anasep ding uh theipina-kampau, thugen, hindan, leh thuhilna khantanhoi toh kituoh gamtat ding ahidan agen hi. Tuaban ah, Jerusalem gam, Juda gam, Samari gam leh kawlmong tan a theipitu hi ding ahidan imu uhi. Mun khat a nasep zou sieng chienga abansawn ding hilouin akitouh/aki bang (simultaneous) asepep ding ahi. Mang haam in “*Both*” chi thumallien agen chieng mama ahi. Pasian in haatna leh bawltheina ahingpie bangzel a leitung pumpi ngim a sepding ahi.

3. **Hattuom Missions kin/manlang tah a sepkhiet ding ahi:** Juda laithot tang 23: (Verse 23) ah, “*Khenkhatte mei a kipatin lakhe meng unlen hundam un*” chi imu uhi. Paunate ah, “*Shina lam a puohmanga umte suohta sah in*” chi imu hi (Pau. 24:11). Hagau mangthai khatzong mantam mama ahi (Mk. 8: 26-27). Seken khat (one second) sungin mihing thum shi zel ahi kichi hi. Pasian in koima manthai ding aphalvawt sih hi (2Pet. 3:9). Leitung buoina leh mangbatna in dimesieng lam et ding bangma a umsih hi (2Pet. 3:1-5, Pau. 27:1, 2Tim. 4:1-5). Puimangna Hagau nasep in masawn mama hi (1Tim. 4:1-2). Leitunga kigel gawtnate zousie sangin mei huoise zawtham ahiziehin meidil

a tuoh ding in koima phal ahuoi sih hi (Lk. 16:19-31, Kil. 20: 11-15). Jesu Khrist hingpei phutthei ahi (Mk. 13:32-33, 1Pet. 3:8-10). Leitung mihing tamzaw thamte meidil a lut ding lelin shishi uhi (Heb. 9: 27, Jak. 4:14, Pau. 24:11-12). Tuate zousie tunga Mangpa Leitung leh vantunga thuneina zousie neipa thupieh ahiziehin seplou theilou, sepding a kiphamaw pen ahi (Mt. 28: 19-20). I seplou leh Mangpa thuneitupa Hagau mangthai sisan phuba hingla ding ahi (Ezk. 3: 18-19).

4. **Hattuum Missions bang chi sepkhiet ding ahiei?** Amasapen in na umna munmun ah nasep theidan danin mite chielna bawl inlen hundamna huonga puilut dingin kipanin. Siem masat sese angaisih. Pasion in akul leh poimaw dungjuin hing panpi ding ahi. Mangpa sawlkhiet thei dinga iumlam hampahtna ahidan ithei ding uh ahi (Dan. 12: 2-3, 1Thess. 2:19-20, Phil. 4:1). Mangpa'n nang hing han ahi chi na theitel leh kuon in (Mk. 16:15-16, Rom 1:16-17). Nangma na kuon theilou leh zong na tanga kuon ding mi sawl theidan aum hi. Hagau mangthaite lah a semtu missionaryte leh Leitung gam lienzaw a missionary nasep na dingin lainatna tahtah toh tunthei ahi (Rom 15:30-31, Eph. 6:18-20, 2Thess. 3:1-2, Late 126: 5-6). Missionary ten hasum (salary) in adai jaw lou, damdawi, sil-le-ten, neh leh tah, vanzat, tampi ki tasam uhi.

Akhupsitna: Pasion in missionary nasep dinga ahing hundam ahi. Hattuumte khu Missionary nasep dinga Pasion in aphukhiet ahi. Hutdam ihina san leh hattuum ihina jieh itheichet mama ngai ahi. Missionary nasep lam lunglutna neilou hattuum khu hattuum shi leh gasuoh lou hattuum ahi. Tuaziehin hattuum hat leh hatlou kichetna hoitah khu missionary nasepna ah kitheipai hi. Tam nasepna khu gingtu zousie mawpuohna ahijiehin pan ilah theidan chiet ah isepchiet ding uh ahi chi imanghillou ding uh ahi.

Dohnte:

1. Missionary nasepna bang ahiei?
 2. Pasion in bangding ah ahing hundam ahiei?
 3. Hattuum bang dinga kiphutkhie ahiei?
-

SIMMUN-25

HAGAU LAM KHANNA DING LAMPI

Thuchin ding : *“I Mangpa leh Hundampa Jesu Khrist hepina leh theina ah hing khanglien un”* 1Pet. 3:18

Taangtel : Jn. 15:1-7, Phil. 2: 1-18, 3:1-16, 2Pet. 1: 3-11.

Zillai in atup : Hagau lam a khangtou zel a umna dinga panlah dingdan kichientah a theisah ding ahi.

THUZIL DING:

Khristian hinkhuo kipatna khu pienthana ahi. Pientha zou chienga Christian hina bukim sienga bangma sep ding umnonlou himaw louin malam sawn a khan ding ahi. Khristian hinkhuo siltup ahileh, Khrist batna nei a khan ding ahi (Gal. 2:20). Paul in zong Galatia a gingtute umding dan adeisahna leh adeina dan khu *“Ama ua Khrist siempi chinga a um ding ahi”* (Gal. 4:9). Pasion in ahing sawlna zong thupina pumpi a sil chienga Khrist toh kibang um ding ahi. Khum khu leitung a ihin sunga Khristiante siltup ding ahi (Rom 8:28-30). Piengtha kichi ngal a nuatol, puasias, chipen gingtute a dinga Hagau lam khantheina dinga sil deihuoilou phatawp ahi.

Khristian Hagau lam a khantheina dingin:

- a) **Gentel kai gige ding ahi:** Gentel kai gige a Pasion bieh a, phatna leh patawina nei zing ding ahi (Jn. 4:24). Thugen ngaisangin eima mimal a Pasion toh kithuona apoimaw zaw ahi. Khumzou chiengin phatna leh patawina, a zawm ahi. Aban ah, thugen khiet a izate phatuom ngaitah a ngaikhaw ding ahi. Bangchih laipou a biehnaw tawpsanlou ding ahi (Heb. 10:25).
- b) **A hunbih neitah a thumzing ding ahi:** Laigeltu khatin, *“Setan in azaupen khu gingtu khat khupdin a Pasion kunga thum lai amu chiengin azaupen hi”* ana chi hi. Laiseingthou in, *“Thumzing leng un, tawplouin thum un”* chi'n ahing hanthawn hi (1Thess. 5:

17). Pasion misiengthou David leh Daniel ten nitengin thumvei thum zing uhi (Late 55: 17, Dan. 6: 10). Thumna ah phatna, patawina, kipah thugenna, khiel thuphatawina leh itahsap poimaw tuomtuomte ngetna atel ding ahi (1Tim. 2:1-2). Tahtah a thum khu Pasion toh kithuokhawm na ahi.

- c) **Laisiengthou sim gige ding ahi:** Hagau lam a ikhanna ding leh hinkhuo a isienthoua ding leh khelna apat ibit theina ding leh thopna bukim Pasion apat inga theina dinga nitenga ahunbih nei a Laisiengthou sim zing/ gige ding ahi (1Pet. 2:2, Late 119: 9, 11, 2Tim. 2:15, 3:16-17). Hagau lam a kalsuonna hing puitu dinga isim zing ding ahi (Late 119:109). Melma douna ding, galdouna ding banga sim gige ding ahi (Epha. 6:17). Mihingpen Ann-kam tuilou tah a tawm nounou nete thahat ngailou uhi. Tuama bangin, Hagau lam ah zong Laisiengthou sim ngailou a, a thum ngailoute hat ngailou uhi (Mt. 4:4).
- d) **Khrist theipina nasep ding ahi:** Gingu in ihinkhuo leh inasep a Jesu Khrist theipi a, Khantanhoi toh kituoh a hinsawm ding ahi (Mk. 5:19, Phil. 127). Mite lah a Jesu Khrist gupngam ding ahi (Mt. 10:26-33, Mk. 8:34-38). Heisung munpen a Jesu Khrist mi/ ihina zumpi lou in, Khantanhoi izumpi lou ding ahi (Rom 1:16). Khristian ihi zieh ua bawlsietna leh sawinate zong kipahna a sim ding ahi (1Pet. 4: 12-16).
- e) **Lawm hoilou apat kiven ding ahi:** Leitung mihingpen khattang um nuomsahlou a, a hon a um khawmte ihi uhi. Pasion thu in, “*Sol in umsih un, lawm gilou in umdan hoi asusie hi*” (1Kor. 15: 33) chin agen hi. Lawm hoi leh lawm hoilou lah a ipilvang ding uh ahi. I lawm leh guolte bawlhoi zou ding ihilou leh, ilawm hoiloute nuasie a kipawlpi nawnlou ahoi mama ding hi (2Kor. 6:14-7:1).
- f) **Khut nnasep itaimat ding ahi:** Laisiengthou ah thada/ thasia a dingin mun umlou ahi. Leitunga khelna alutma na ngawn in Pasion in ami siem masa Adam leh Evi kungah nasep ding apie hi (Siem. 2: 15). Mihing a thada/ thasete ganhing lah a neupen

apat zil dinga hil in a um hi (Pau. 6:6-11). Mi thasete zawmthawt dan zong Laisiengthou ah imu uhi (Pau. 26: 13-16). Ganhing neu a kikhuol siemte etton dinga um uhi (Pau. 30: 24-30). Thuhun Tha ah silhoi bawl dinga ihidan bang (Epha. 2:10). Silbawl leh nasep a hausa ding (1Tim. 6:18) a thuhil in ium uhi. Sawltah lien Paul ngel in, “.... *Koi inzong na asepnop sih leh nehzong neh sih hen*” (2Thess. 3:10b) ana chi hi.

- g) **Pasian siengthouna kopi ding ahi:** Khristiante khu ihinkhuo, nasep a, neh-le-dawn, tualeh etnopte tanpha a isienthou ding uh ahi (1Thess. 4: 11-12, Rom 14:20-21, Late 39: 1, Job 31:1). Pasian in siengthou dingin ahing han hi (1Thess. 4:7-8). Sienthoua lou a Pasian kimu theilou ahidan zong ahing hil hi (Heb. 12:14). Pasian in Ama banga siengthou dingin ahing dei hi (1Pet. 1:15-16).
- h) **Setan leh solna idou ding ahi:** Laisiengthou in, “*Pasian thu thu in um un, hinanleh Setan dou un, tuachiin a hing taimangsan ding*” chi’n ahing hil hi (Jak. 4:7, 1Pet. 5:8-10). Solna thuohin idou teitei/ paupau ding uh ahi (Jak. 1:12). Solna a ipuo chiengin izaw thei dingpi zong zoulou kihi dan hi (1Kor. 10:3).

Akhupsitna: Pasian kunga kipumpiehna hinkhuo neiin (Rom 12:1-2) igenzousa thute theiin zui chiet lei Hagau lam a nuatol chi tawm mama dingin akimu uhi. Mi tampite solnate doulou, Setan zong doulou, mi siengthou Joshep in thei tawpa dou in azou hi (Siem. 30: 6-12). Eiten khumbang solna tuoh hilei bang ichi diei? Ka suisui ka muta ichi mai diei? Daniel in neh-le-dawn ah tupna kiptah neiin kideh zou hi (Dan. 1:8-20). Nuotolte tungah Pasian alungkim sih hi (Heb. 10:38). Tam thu manghil vawtsin, “*Solna thuoh teitei mi ahampha hi, Ze-et a a um nua in hinna Manglukhu Mangpa’n ama itte kunga a chiem khu mu ding hi*” (Jak. 1:12).

Dohnte:

1. Khristian hinkhuo siltup bang ahiei?
 2. Laisiengthou in koite a dingin mun a umsih achi ei?
 3. Khristian hinkhuo kepbitna bang ahiei?
-

